

欽定宋史

卷之十  
二四九

宋史卷二十四

元中書右丞相總裁脫脫等修

本紀第二十四

高宗一

高宗受命中興全功至德聖神武文昭仁憲孝皇帝諱  
構字德基徽宗第九子母曰顯仁皇后韋氏大觀元年  
五月乙巳生東京之大內赤光照室八月丁丑賜名授  
定武軍節度使檢校太尉封蜀國公二年正月庚申封  
廣平郡王宣和三年十二月壬子進封康王資性朗悟  
博學彊記讀書日誦千餘言挽弓至一石五斗宣和四

年始冠出就外第靖康元年春正月金人犯京師軍于城西北遣使入城邀親王宰臣議和軍中朝廷方遣同知樞密院事李稅等使金議割太原中山河間三鎮遣宰臣授地親王送大軍過河欽宗召帝諭指帝慷慨請行遂命少宰張邦昌爲計議使與帝俱金帥幹離不留之軍中旬日帝意氣閒暇二月會京畿宣撫司都統制姚平仲夜襲金人砦不克金人見責邦昌恐懼涕泣帝不爲動幹離不異之更請肅王癸卯肅王至軍中許割三鎮地進邦昌爲太宰留質軍中帝始得還金兵退復遣給事中王雲使金以租賦贖三鎮地又以蠟書結遼

降將耶律余覲爲金人所得八月金帥黏罕復引兵深入陷太原斡離不破真定冬十月王雲從吏自金先還言金人須帝再至乃議和雲歸言金人堅欲得地不然進兵取汴都十一月詔帝使河北奉袞冕玉輅尊金主爲伯上尊號十八字被命卽發京師以門下侍郎耿南仲主和議請與俱乃以其子中書舍人延禧爲參議官偕行帝由滑瀆至磁州守臣宗澤請曰肅王去不返金兵已迫復去何益請留磁磁人以雲將挾帝入金遂殺雲時黏罕斡離不已率兵渡河相繼圍京師從者以磁不可留知相州汪伯彥亦以蠟書請帝還相州閏月耿

南仲馳至相見帝致辭以面受欽宗之旨盡起河北兵入衛帝乃同南仲募兵勤王初朝廷聞金兵渡河欲拜帝爲元帥至是殿中侍御史胡唐老復申元帥之議尚書右僕射何臬擬詔書以進欽宗遣閣門祇候秦仔持蠟詔至相拜帝爲河北兵馬大元帥知中山府陳亨伯爲元帥汪伯彥宗澤爲副元帥仔於頂髮中出詔帝讀之嗚咽兵民感動十二月壬戌朔帝開大元帥府有兵萬人分爲五軍命武顯大夫陳淬都統制軍馬閣門祇候侯章齋蠟書至自京師詔帝盡發河北兵命守臣自將帝乃下令諸郡守與諸將議引兵渡河乙亥帝率兵

離相州丙子履冰渡河丁丑次大名府宗澤以二千人先諸軍至知信德府梁揚祖以三千人繼至張俊苗傅楊沂中田師中皆在麾下兵威稍振會簽書樞密院事曹輔齋蠟詔至云金人登城不下方議和好可屯兵近甸毋輕動汪伯彥等皆信和議惟宗澤請直趨澶淵爲壁次第解京城之圍伯彥南仲請移軍東平帝遂遣澤以萬人進屯澶淵揚言帝在軍中自是澤不復預府中謀議帝決意趨東平庚寅帝發大名

建炎元年春正月癸巳帝至東平初帝軍在相州京城圍久中外莫知帝處及是陳請四集取決帥府壬寅高

陽關路安撫使黃潛善總管楊惟忠亦部兵數千至東平命潛善進屯與仁留惟忠爲元帥都統制金人聞帝在澶淵遣甲士及中書舍人張澂來召宗澤命壯士射之澂乃遁伯彥等請帝如濟州二月庚辰發東平癸未次濟州時帥府官軍及羣盜來歸者號百萬人分屯濟濮諸州府而諸路勤王兵不得進二帝已在金人軍中三月丁酉金人立張邦昌爲帝稱大楚黃潛善以告帝慟哭僚屬欲奉帝駐軍宿州謀渡江左帝聞三軍籍籍遂輒承制以宗澤爲徽猷閣待制丁巳幹離不退師徽宗北遷戊午承制以汪彥伯爲顯謨閣待制充元帥潛

善爲徽猷閣待制充副元帥夏四月黏罕退師欽宗北遷癸亥邦昌尊元祐皇后爲宋太后遣人至濟州訪帝又遣吏部尚書謝克家來迎耿南仲率幕僚勸進帝避席流涕遜辭不受伯彥等引天命人心爲請且謂靖康紀元爲十二月立康之兆帝曰當更思之以知淮寧府趙子崧爲寶文閣學士元帥府參議官東南道總管統東南勤王兵邦昌遣閣門宣贊舍人蔣師愈等持書詣帝自言從權濟事及將歸寶避位之意帝亦貽諸帥書以未得至京已至者毋輒入聞資政殿大學士領開封府事李綱在湖北遣劉默持書訪之又諭宗澤等以受

僞命之人義當誅討然慮事出權宜未可輕動澤復書謂邦昌篡亂踪跡已無可疑宜早正天位興復社稷不可不斷門下侍郎呂好問亦以蠟書來言帝不自立恐有不當立而立者丁卯謝克家以大宋受命之寶至濟州帝慟哭跪受命克家還京師趣辦儀物戊辰濟州父老詣軍門言州四旁望見城中火光屬天請帝卽位于濟會宗澤來言南京乃藝祖興王之地取四方中漕運尤易遂決意趨應天是夕邦昌手書上延福宮太后尊號曰元祐皇后入居禁中以尚書左丞馮澥爲奉迎使皇后又遣兄子衛尉少卿孟忠厚持手書遺帝皇后垂

簾聽政邦昌權尚書左僕射率在京百官上表勸進不許甲戌皇后手書告中外俾帝嗣統乙亥百官再上表又不許丁丑馮澥等至濟州百官三上表許以權聽國事戊寅命宗澤先勒兵分駐長垣韋城等縣以備非常東道副總管朱勝非至濟州宣撫司統制官韓世忠以兵來會庚辰帝發濟州鄜延副總管劉光世自陝州來會以光世爲五軍都提舉辛巳次單州壬午次虞城縣西道都統管王襄自襄陽來會癸未至應天府皇后詔有司備法駕儀仗乙酉張邦昌至伏地慟哭請死帝慰撫之承制以汪伯彥爲顯謨閣直學士黃潛善爲徽猷

閣直學士權吏部尚書王時雍等奉乘輿服御至羣臣  
勸進者益衆命有司築壇府門之左五月庚寅朔帝登  
壇受命禮畢慟哭遙謝二帝卽位于府治改元建炎大  
赦常赦所不原者咸赦除之張邦昌及應于供奉金國  
之人一切不問命西京留守司修奉祖宗陵寢罷天下  
神霄宮住散青苗錢應死節及歿于王事者並推恩奉  
使未還者祿其家一年應選人並循資已係承直郎者  
改次等京官臣僚因亂去官者限一月還任潰兵羣盜  
咸許自新免係官欠負蠲南京及元帥府常駐軍一月  
以上州縣夏稅應天府特奏名舉人並與同進士出身

免解人與免省諸路特奏名三舉以上及宗室嘗預貢者並推恩應募兵勤王人以兵付州縣主兵官聽赴行在中外臣庶許言民間疾苦雖詆訐亦不加罪命官犯罪更不取特旨裁斷蔡京童貫朱勔李彥孟昌齡梁師成譚稹及其子孫更不收叙內外大臣限十日各舉布衣有材畧者一人餘如故事以黃潛善爲中書侍郎汪伯彥同知樞密院事元祐皇后在東京是日徹簾辛卯遙尊靖康皇帝爲孝慈淵聖皇帝元祐皇后爲元祐太后詔史官辨宣仁聖烈皇后誣謗築景靈宮于江寧府壬辰以張邦昌爲太保奉國軍節度使同安郡王五日

一赴都堂參決大事以河東北宣撫使范訥爲京城留守癸巳遙尊帝母韋賢妃爲宣和皇后遙立嘉國夫人邢氏爲皇后耿南仲罷甲午以李綱爲尚書右僕射兼中書侍郎趣赴行在楊惟忠爲建武軍節度使主管殿前司公事罷諸盜及民兵之爲統制者簡其士馬隸五軍乙未以生辰爲天申節馮澥罷以兵部尚書呂好問爲尚書右丞命中軍統制馬忠後軍統制張渙率兵萬人趣河間府追襲金人丙申以呂好問兼門下侍郎丁酉以黃潛善兼御營使汪伯彥副之眞定府路副總管王淵爲都統制鄜延路副總管劉光世提舉一行事務

王時雍黃州安置命統制官薛廣張瓊率兵六千人會  
河北山水砦義兵共復磁相戊午以資政殿學士路允  
迪爲京城撫諭使龍圖閣學士耿延禧副之贈吏部侍  
郎李若水觀文殿學士諡忠愍己亥召太學生陳東赴  
行在李綱至江寧誅叛卒周德等庚子詔以靖康大臣  
主和誤國責李邦彥爲建寧軍節度副使潯州安置徙  
吳敏柳州蔡懋英州李稅宇文虛中鄭望之李鄴皆以  
使金請割地責廣南諸州並安置辛丑詔張邦昌知幾  
達變勲在社稷如文彥博例月兩赴都堂壬寅封後宮  
潘氏爲賢妃以江淮發運使梁揚祖提領東南茶鹽事

癸卯天申節罷百官上壽乙巳賜諸路勤王兵還營者  
錢人三千丙午以誣謗宣仁聖烈皇后追貶蔡確蔡卞  
邢恕蔡懋官以保靜軍節度使姚古知河南府金人陷  
河中府權府事郝仲連死之丁未徽宗至燕山府庚戌  
以宗澤爲龍圖閣學士知襄陽府壬子進張邦昌太傅  
丙辰罷監察御史張所尋責江州安置丁巳詔成都在京  
兆襄陽荆南江寧府鄧揚二州儲資糧修城壘以備巡  
幸以簽書樞密院事張叔夜嘗援京城力戰從徽宗北  
行遙命爲觀文殿大學士醴泉觀使戊午右諫議大夫  
范宗尹罷遣太常少卿周望使河北軍前通問二帝西

道總管王襄北道總管趙野坐勤王稽緩並分司襄陽府青州居住尋責襄永州野邵州並安置六月己未朔李綱入見上十議曰國是巡幸赦令僭逆偽命戰守本政責成修德以前殿前副都指揮使王宗漈引衛兵遁逃致都城失守責官邵州安置徽猷閣直學士徐秉哲假資政殿學士爲大金通問使秉哲辭庚申封靖康軍節度使仲湜嗣濮王黏罕還屯雲中辛酉命新任郎官未經上殿者並引對御史中丞顏岐罷徐秉哲責官梅州安置詔河北京陝淮湖江浙州軍縣鎮募人修築城壁壬戌置登聞檢鼓院癸亥以黃潛善爲門下侍郎兼

權中書侍郎張邦昌坐僭逆責降招化軍節度副使潭州安置及受僞命臣僚王時雍高州吳玘永州莫儔全州李擢柳州孫覲歸州並安置顏博文王紹以下論罪有差以知懷州霍安國河東宣撫使劉韜死節贈安國延康殿學士韜資政殿大學士甲子命李綱兼御營使乙丑以龍神衛四廂都指揮使馬忠爲河北經制使措置民兵洪芻罷左諫議大夫下臺獄丁卯以祠部員外郎喻汝礪爲四川撫諭督漕計羨緡及常平錢物罷開封諸州軍府司錄曹掾官州軍通判二員者省其一權減宰執奉賜三之一省諸路提舉常平司兩浙福建提

舉市舶司賊李孝忠寇襄陽守臣黃叔敖棄城遁立格  
買馬辛未以子塹生大赦籍天下神霄宮錢穀充經費  
拘天下職田錢隸提刑司還元祐黨籍及上書人恩數  
癸酉詔陝西山東諸路帥臣團結軍民互相應援乙亥  
增諸縣弓手置武尉領之宗室叔向以所募勤王兵屯  
京師或言爲變命劉光世捕誅之戊寅以汪伯彥知樞  
密院事遣宣義郎傅雱使河東軍前通問二帝己卯置  
沿河沿淮沿江帥府十有九要郡三十九次要郡三十  
八帥守兼都總管守臣兼鈐轄都監總置軍九十六萬  
七千五百人別置水軍七十七將造舟江淮諸路置三

省樞密院賞功司東京留守范訥落節鉞淄州居住庚辰以二帝未還禁州縣用樂辛巳置沿河巡察六使壬午以戶部尚書張慤同知樞密院事兼提舉措置戶部財用癸未呂好問罷甲申併尚書戶部右曹所掌歸左曹命尚書總領乙酉以宗澤爲東京留守杜充爲北京留守罷監司州郡職田丙戌詔陝西河北京東西路募兵合十萬人更番入衛行在命京東西路造戰車丁亥以張所爲河北西路招撫使括買官民馬勸出財助國戊子以錢蓋爲陝西經制使封趙懷恩爲安化郡王因召五路兵赴行在秋七月巳丑朔以樞密副都承旨王

變爲河東經制使庚寅詔王淵劉光世統制官張俊喬仲福韓世忠分討陳州軍賊杜用京東賊李昱及黎驛魚臺潰兵皆平之辛卯籍東南諸州神霄宮及贍學錢助國用叙右監門衛大將軍貴州團練使士瑋以磁洛義兵復洛州乙未以溫州觀察使范瓊爲定武軍承宣使御營司同都統制丙申賜諸路彊壯巡社名爲忠義巡社專隸安撫司戊戌欽宗至燕山府以忻州觀察使張渙爲河北制置使東都宣武卒杜林謀據成都叛伏誅己亥詔臺省寺監繁簡相兼學官館職減舊制之半辛丑復議吳玠莫儔等十一人罪並廣南江湖諸州安

置餘遞貶有差壬寅詔奉元祐太后如東南六宮及衛  
士家屬從行朕當獨留中原與金人決戰以延康殿學  
士許翰爲尚書右丞甲辰以右諫議大夫宋齊愈當金  
人謀立異姓書張邦昌姓名斬于都市乙巳手詔京師  
未可往當巡幸東南丙午詔定議巡幸南陽以觀文殿  
學士范致虛知鄧州修城池繕宮室輸錢穀以實之丁  
未遣官詣京師迎奉太廟神主赴行在己酉罷四道都  
總管以尚書虞部員外郎張浚爲殿中侍御史庚戌徵  
諸道兵期八日會行在丙辰徽宗自燕山密遣閣門宣  
贊舍人曹勛至賜帝絹半臂書其領曰便可卽真來援

父母帝泣以示輔臣張所傅亮軍發行在是月關中賊  
史斌犯興州僭號稱帝八月戊午朔洪芻等坐圍城日  
括金銀自盜及私納宮人芻及余大均陳沖貸死流沙  
門島餘五人罪有差勝捷軍校陳通作亂于杭州執帥  
臣葉夢得殺漕臣吳昉己未元祐太后發京師庚申以  
劉光世爲奉國軍節度使韓世忠張俊皆進一官辛酉  
右司諫潘良貴罷壬戌以李綱爲尚書左僕射兼門下  
侍郎黃潛善爲右僕射兼中書侍郎張慤兼御營副使  
癸亥命御營使副大閱五軍庚午更號元祐太后爲隆  
祐太后辛未罷傅亮經制副使召赴行在壬申召布衣

譙定赴行在命御營統制辛道宗討陳通是夕東北方  
有赤氣癸酉以耿南仲主和誤國南雄州安置乙亥用  
張浚言罷李綱左僕射丙子隆祐太后發南京命侍衛  
馬軍都指揮使郭仲荀護衛如江寧兼節制江淮荆浙  
閩廣諸州制置東南盜賊丁丑以龍圖閣直學士錢伯  
言知杭州節制兩浙淮東將兵及福建槍杖手討陳通  
庚辰降勝招諭杭州亂兵壬午用黃潛善議殺上書太  
學生陳東崇仁布衣歐陽澈乙酉遣兵部員外郎江端  
友等撫諭閩浙湖廣江淮京東西諸路及體訪官吏貪  
廉軍民利病許翰罷丁亥博州卒宮儀作亂犯萊州九

月己丑建州軍校張員等作亂執守臣張動轉運副使  
毛奎爲所殺判官曹仔嬰城自守范瓊捕斬李孝忠于  
復州壬辰以金人犯河陽汜水軍詔擇日巡幸淮甸鑄  
建炎通寶錢命淮浙沿海諸州增修城壁招訓民兵以  
備海道甲午命揚州守臣呂頤浩繕修城池宗澤往河  
北視師七月還是夜辛道宗兵潰于嘉興縣丁酉詔荆  
襄關陝江淮皆備巡幸戊戌罷買馬己亥以子奭爲檢  
校少保集慶軍節度使封魏國公詔內外官司參用嘉  
祐元豐勅以俟新書庚子二帝徙居霽郡辛丑陳通劫  
提點刑獄周格營殺格執提點刑獄高士瞻壬寅遣徽

猷閣待制孟忠厚迎奉太廟神主赴揚州以直秘閣王  
圭爲招撫判官代張所尋責所廣南安置乙巳宗澤表  
請車駕還闕戊申河北招撫司都統制王彥渡河擊金  
人破之復新興縣己酉以諜報金人欲犯江浙詔暫駐  
淮甸捍禦稍定卽還京闕募民入貲授官軍賊趙萬入  
常州執守臣何袞罷諸路經制招撫使庚戌始通當三  
大錢于淮浙荆湖諸路壬子命湖南撫諭官馬伸持詔  
賜張邦昌死于潭州併誅王時雍癸丑詔有敢妄議惑  
衆沮巡幸者許告而罪之不告者斬乙卯王彥及金人  
戰敗績奔太行山聚衆其裨將岳飛引其部曲自爲一

軍趙萬陷鎮江府守臣趙子崧棄城渡江保瓜洲是秋  
金人分兵據兩河州縣惟中山慶源府保莫邢洛冀磁  
絳相州久之乃陷冬十月丁巳朔帝登舟幸淮甸戊午  
太后至揚州己未罷諸路勸誘獻納錢物庚申罷諸路  
召募潰兵忠義等人及寄居官擅集勤王兵者癸亥募  
羣盜能併滅賊衆者官之甲子以張浚論李綱不已落  
綱觀文殿大學士止奉宮祠知秀州兼權浙西提點刑  
獄趙叔近入杭州招撫陳通乙丑罷帥府要郡次要郡  
及新軍水軍丁卯以王淵爲杭州制置盜賊使統制官  
張俊從行庚午次泗州幸普照寺甲戌太白晝見己卯

次楚州寶應縣後軍將孫琦等作亂逼左正言盧臣中墮水死庚辰命劉光世討鎮江叛兵辛巳以光世爲滁和濠州江寧府界招捉盜賊制置使御營統制官苗傅爲使司都統制朝請郎李棫提舉廣西左右兩江峒丁公事癸未至揚州禁內侍統兵官相見丙戌王淵張俊誘趙萬等悉誅之十一月戊子李綱鄂州居住真定軍賊張遇入池州守臣滕祐棄城遁己丑詔雜犯死罪有疑及情理可憫者撫諭官同提刑司酌情減降先斷後聞壬辰遣王倫等爲金國通問使乙未以張慤爲尚書左丞工部尚書顏岐同知樞密院事丙申曲赦應天府

亳宿揚泗楚州高郵軍丙午以張慤爲中書侍郎戊申以顏岐爲尚書左丞兼權門下侍郎御史中丞許景衡爲右丞刑部尚書郭三益同知樞密院事權密州趙野棄城遁軍校杜彥據州追野殺之辛亥命福建路增招弓手金人陷河間府是月軍賊丁進圍壽春府守臣康允之拒却之十二月丙辰朔命從臣四員充講讀官就內殿講讀丁巳詔諸路提刑司選官卽轉運司所在州類省試進士以待親策辛酉王淵入杭州執陳通等誅之壬戌青州敗將王定以兵作亂殺帥臣曾孝序癸亥黏罕犯汜水關西京留守孫昭遠遣將拒之戰歿昭遠

引兵南遁尋命部將王仔奉啓運宮神御赴行在甲子  
改授后父徽猷閣待制邢煥爲光州觀察使乙丑詔凡  
刑賞大政並經三省其干請墨勅行下者罪之丙寅張  
遇犯江州戊辰金人圍棣州守臣姜綱之固守金兵解  
去甲戌金人陷同州守臣鄭驤死之張遇犯黃州己卯  
金人陷汝州入西京庚辰金人陷華州辛巳破潼關河  
東經制使王瓌自同州引兵遁入蜀丁進詣宗澤降乙  
酉增置廣西弓手以備邊以戶部尚書黃潛厚爲延康  
殿學士同提舉措置財用

宋史卷二十五

元中書右丞相總裁脫脫等修

本紀第二十五

高宗二

二年春正月丙戌朔帝在揚州丁亥錄兩河流域亡吏士沿河給流民官田牛種戊子金人陷鄧州委撫劉汲死之辛卯置行在權貨務壬辰金人犯東京宗澤遣將擊郤之癸巳復明法新科甲午詣壽寧寺謁祖宗神主乙未金人破永興軍前河東經制副使傅亮以兵降經略使唐重副總管楊宗閔提舉軍馬陳迪轉運副使桑景

詢判官曾謂提點刑獄郭忠孝經略司主管機宜文字  
王尚及其子建中俱死之東平府兵馬鈐轄孔彥舟叛  
渡淮犯黃州守臣趙令歲拒之丙申詔自今犯枉法自  
盜贓者中書籍其姓名罪至徒者永不錄用金人陷均  
州守臣楊彥明遁去丁酉金人陷房州己亥張遇焚真  
州祕閣修撰孫昭遠爲亂兵所害庚子遣主客員外郎  
謝亮爲陝西撫諭使兼宣諭使持詔賜夏國張遇陷鎮  
江府守臣錢伯言棄城走辛丑內侍邵成章坐輒言人  
臣除名南雄州編管金人陷鄭州通判趙伯振死之癸  
卯金帥窩里噶陷濰州又陷青州尋棄去丁未詔諭流

民潰兵之爲盜賊者釋其罪己酉禁諸將引潰兵入蜀  
置大散關使以審驗之庚戌遣考功員外郎傅雱爲淮  
東京東西撫諭使辛亥王淵招降張遇以所部萬人隸  
韓世忠改授顯謨閣直學士孟忠厚爲常德軍承宣使  
詔凡后族毋任侍從官著爲令金人焚鄧州是月以中  
奉大夫劉豫知濟南府金人陷潁昌府守臣孫默爲所  
殺經制司僚屬王擇仁復永興軍金人陷秦州經略使  
李復降又犯熙河經略使張深遣兵馬都監劉惟輔與  
戰于新店敗之斬其帥黑鋒二月丙辰金人再犯東京  
宗澤遣統制閻中立等拒之中立戰死戊午移耿南仲

于臨江軍金人陷唐州壬戌安化軍節度副使宇文虛  
中應詔使絕域復中大夫召赴行在癸亥罷市易務甲  
子金人犯滑州宗澤遣張撝救之戰死乙丑澤遣判官  
范世延等表請帝還闕河北賊楊進等詣澤降丁卯復  
延康述古殿直學士爲端明樞密直學士辛未詔自今  
犯枉法自盜贓罪至死者籍其貲壬申赦福州叛卒張  
員等癸酉金人陷蔡州執守臣閻孝忠丙子金人陷淮  
寧府守臣向子韶死之丁丑遣王貺等克金國軍前通  
問使戊寅責降知鎮江府趙子崧爲單州團練副使南  
雄州安置己卯奪祕書正字胡瑄官送梧州編管朝奉

大夫劉正彥應詔使絕域授武德大夫威州刺史尋爲御營右軍副統制庚申以王淵爲嚮德軍節度使辛巳武功大夫和州防禦使馬擴奔真定五馬山砦聚兵得皇弟信王榛于民間奉之總制諸砦壬午詔京畿京東西河北淮南路置振華軍八萬人是月成都守臣盧法原修城成三月辛卯金人陷中山府壬辰詔諸路安撫使許便宜節制官吏丁酉初立大小使臣呈試弓馬出官格先閱試然後奏補黏罕焚西京去庚子河南統制官翟進復西京宗澤奏進爲京西北路安撫制置使丙午遙授尚書右僕射何桌爲觀文殿大學士中書侍郎

陳過庭爲資政殿大學士同知樞密院事聶昌爲資政殿大學士並主管宮觀時桌已卒于金昌爲人所殺朝廷未之知過庭亦在金軍中丁未罷內外權局官之不應法者遣楊應誠爲大金高麗國信使己酉張員等復作亂擁衆突城出命本路提點刑獄李芑討捕之辛亥以范瓌權同主管侍衛步軍司公事屯眞州是月金人陷鳳翔府守臣劉清臣棄城去又犯涇原經略使曲端遣將拒戰敗之金兵走同華石壕尉李彥仙舉兵復陝州夏四月丙辰詔文臣從官至牧守武臣管軍至遙郡各舉所知二人戊午禁州縣責鄰保代輸逃戶稅役宗

澤遣將趙世興復滑州乙丑翟進以兵襲金帥兀室于河南兵敗其子亮死之進又率御營統制韓世忠京城都巡檢使丁進等兵戰于文家寺又敗世忠收餘兵南歸兀室復入西京尋棄去隴右都護張巖及金人戰于五里坡敗績死之丁卯金人入洛州壬辰軍賊孫琦焚隨州癸未入唐州信王榛遣馬擴來奏事是月以榛爲河外兵馬都元帥擴爲元帥府馬步軍都總管五月乙酉許景衡罷孫琦犯德安府丙戌命參酌元祐科舉條制立詩賦經義分試法戊子以翰林學士朱勝非爲尚書右丞辛卯以金兵渡河遣韓世忠宗澤等逆戰甲午

曲赦河北陝西京東路福建轉運判官謝如意執張員等六人誅之丙申復命宇文虛中爲資政殿大學士克金國祈請使賊靳賽寇光山縣戊戌河北制置使王彥部兵渡河屯滑州之沙店癸卯張慤薨甲辰金帥婁宿陷絳州丁未復置兩浙福建提舉市舶司己酉秀州卒徐明等作亂執守臣朱芾迎前守趙叔近復領州事命御營中軍統制張俊討之癸丑罷借諸路職田六月乙卯邛州鑄錢增印錢引癸亥建州卒葉濃等作亂寇福州甲子親慮囚乙丑張俊至秀州殺趙叔近執徐明斬之甲戌葉濃陷福州丁丑詔江浙沿流州軍練水軍造

戰艦京畿淮甸蝗是月以知延安府王庶節制陝西六  
路軍馬涇原經略使曲端爲節制司都統制永興軍經  
略使郭瑑逐王擇仁擇仁奔興元秋七月甲申葉濃入  
寧德縣復還建州命張俊同兩浙提點刑獄趙哲率兵  
討之丙戌詔吏部審量京官非政和以後進書頌及直  
赴殿試人乃聽參選宗澤薨丁亥詔百官坐蔡京王黼  
擬授而廢者許自新復用戊子禁軍中抉目剗心之刑  
壬辰選江浙州軍正兵土兵六之一赴行在乙未以郭  
仲荀爲京城副留守戊戌錄內外諸軍將士功辛丑以  
春霖夏旱蝗詔監司郡守條上闕政州郡災甚者蠲田

賦甲辰以降授北京留守杜克復樞密直學士爲開封  
尹東京留守八月甲寅初鑄御寶三甲戌御集英殿策  
試禮部進士罷殿中侍御史馬伸尋責濮州河北京東  
捉殺使李成叛辛巳犯宿州是月二帝徙居韓州九月  
甲申丁進叛復寇淮西庚寅賜禮部進士李易以下四  
百五十一人及第出身特奏名進士皆許調官壬辰召  
侍從所舉褚宗諤等二十一人驛赴行在癸巳金人陷  
冀州將官李政死之甲午金人再犯永興軍經略使郭  
琰棄城退保義谷辛丑陝西節制司兵官賀師範及金  
人戰于八公原敗績死之丙午復所滅京官奉丁未東

京留守統制官薛廣及金人戰于相州敗死己酉郭三益薨是秋窩里噶撻懶破五馬山砦信王榛不知所終馬擴軍敗于北京之清平冬十月甲寅命揚州濬墮修城閱江淮州郡水軍楊應誠還自高麗戊午遣劉光世討李成壬戌禁江浙閉糴癸亥黏罕圍濮州遣韓世忠范瓊領兵至東平開德府分道拒戰又命馬擴援之甲子命孟忠厚奉隆祐太后幸杭州楊進復叛攻汝洛命翟進擊于鳴臯山翟進戰死丙子罷吏部審量崇寧大觀以來濫賞止令自陳是月劉正彥擊丁進降之十一月辛巳朔提舉嵩山崇福宮李綱責授單州團練副使

萬安軍安置劉光世及李成戰于新息縣成敗走高麗  
國王王楷遣其臣尹彥頤入見金人圍陝州守臣李彥  
仙拒戰卻之壬辰金人陷延安府權知府劉選總管馬  
忠皆遁通判府事魏彥明死之癸巳趙哲大破葉濃于  
建州城下濃遁而降復謀爲變張俊禽斬之乙未金人  
陷濮州執守臣楊粹中又陷開德府守臣王棣死之以  
魏行可克金國軍前通問使庚子詣壽寧寺朝饗祖宗  
神主壬寅冬至祀昊天上帝于園丘以太祖配大赦金  
人陷相州守臣趙不試死之甲辰陷德州兵馬都監趙  
叔取死之庚戌立士庶子弟習射補官法是月節制陝

西軍馬王庶爲都統制曲端所拘奪其印四川茶馬趙  
開罷官買賣茶給引通商如政和法金人犯晉寧軍守  
臣徐徽言拒郤之知府州折可求以城降金人陷淄州  
涇原兵馬都監吳玠襲斬史斌濱州賊蓋進陷棣州守  
臣姜剛之死之京東賊李民詣行在請降王淵殲其衆  
留民爲將十二月乙卯太后至杭州扈從統制苗傅以  
其軍八千人駐奉國寺庚申金人犯東平府京西路制  
置使權邦彥棄城去又犯濟南府守臣劉豫以城降甲  
子金人陷大名府提點刑獄郭永罵敵不屈死之轉運  
判官裴億降又陷襲慶府乙丑陷虢州丙寅初命修國

史己巳以黃潛善爲尚書左僕射兼門下侍郎汪伯彥  
右僕射兼中書侍郎顏岐門下侍郎朱勝非中書侍郎  
兵部尚書盧益同知樞密院事辛未金人犯青州丁丑  
特進致仕余深金紫光祿大夫致仕薛昂並分司進昌  
軍徽州居住耿南仲再責單州別駕唐恪追落觀文殿  
大學士戊寅以禮部侍郎張浚兼御營參贊軍事教習  
長兵是冬杜克決黃河自泗入淮以阻金兵

三年春正月庚辰朔帝在揚州以京西北路兵馬鈐轄  
翟興爲河南尹京西北路安撫制置兼招討使京西賊  
貴仲正陷岳州甲申以資政殿學士路允迪簽書樞密

院事丁亥金人再陷青州又陷濰州焚城而去京東安撫劉洪道入青州守之己丑奉安西京會聖宮累朝御容于壽寧寺占城國入貢趣大金通問使李鄴周望宋彥通吳德休等往軍前辛卯陝州都統邵興及金人戰于潼關敗之復虢州乙未杜克遣岳飛桑仲討其叛將張用于城南其徒王善救之官軍敗績庚子張用王善寇淮寧府守臣馮長寧却之詔百官聞警遣家屬避兵致物情動搖者流丙午黏罕陷徐州守臣王復及子倚死之軍校趙立結鄉兵爲興復計御營平寇左將軍韓世忠軍潰于沐陽其將張遇死世忠奔鹽城金兵執淮

陽守臣李寬殺轉運副使李跋以騎兵三千取彭城間道趣淮甸戊申至泗州二月庚戌朔始聽士民從便避兵命劉正彥部兵衛皇子六宮如杭州江淮制置使劉光世阻淮拒金人敵未至自潰金人犯楚州守臣朱琳降辛亥金人陷天長軍壬子內侍鄭詢報金兵至帝被甲馳幸鎮江府是日金兵過楊子橋癸丑游騎至瓜洲太常少卿季陵奉太廟神主行金兵追之失太祖神主王淵請幸杭州命留朱勝非守鎮江以吏部尚書呂頤浩爲資政殿大學士江淮制置使都巡檢使劉光世爲殿前都指揮使克行在五軍制置使駐鎮江府控扼江

口主管馬軍司楊惟忠節制江東軍馬駐江寧府是夕發鎮江次呂城鎮金人入真州甲寅次常州御營統制王亦謀據江寧不克而遁御營平寇前將軍范瓊自東平引兵至壽春其部兵殺守臣鄧紹密丙辰次平江府丁巳金人犯泰州守臣曾班以城降丁進縱兵剽掠王淵誘誅之戊午次吳江縣命朱勝非節制平江府秀州控扼軍馬禮部侍郎張浚副之又命勝非兼御營副使留王淵守平江以忠訓郎劉俊民爲閣門祇候齋書使金軍詔錄用張邦昌親屬仍命俊民持邦昌貽金人約和書藁以行金人陷滄州守臣劉錫棄城走己未次秀

州命呂頤浩往來經制長江以龍圖閣待制知江州陳彥文爲沿江措置使庚申次崇德縣呂頤浩從行卽拜同簽書樞密院事江淮兩浙制置使以兵二千還屯京口又命御營中軍統制張俊以兵八千守吳江吏部員外郎鄭資之爲沿江防托監察御史林之平爲沿海防托募海舟守隘壬戌駐蹕杭州金人陷晉寧軍守臣徐徽言死之癸亥下詔罪己求直言令有司具舟常潤迎濟衣冠軍民家屬省儀物膳羞出宮人之無職掌者乙丑降德音赦雜犯死罪以下囚放還士大夫被竄斥者惟李綱罪在不赦更不放還蓋用黃潛善計罪綱以謝

金人置江寧府權貨務都茶場丁卯百官入見應迪功  
郎以上並赴朝參戊辰出米十萬斛卽杭秀常湖州平  
江府損直以糶濟東北流寓之人金人焚揚州己巳用  
御史中丞張澂言罷黃潛善汪伯彥以戶部尚書葉夢  
得爲尚書左丞澂爲右丞庚午詔平江鎮江府常湖杭  
越州具寓居京朝官己上姓名以備簡拔分命浙西監  
司等官募土豪守千秋垂脚襄陽諸嶺以扼宣常諸州  
險要金人去揚州辛未詔御營使司唯掌行在五軍凡  
邊防經制並歸三省樞密金人過高郵軍守臣趙士瑗  
棄城走潰兵宋進犯泰州守臣曾班遁壬申罷軍期司

培歛民財者呂頤浩遣將陳彥渡江襲金餘兵復揚州  
癸酉靳賽犯通州韓世忠小校李在叛據高郵甲戌黃  
潛善汪伯彥並落職乙亥召朱勝非赴行在留張浚駐  
平江贈陳東歐陽澈承事郎官有服親一人恤其家召  
馬伸赴行在卒贈直龍圖閣丙子詔士民直言時政得  
失是月以王庶爲陝西節制使知京兆府節制司都統  
制曲端爲鄜延經略使知延安府張用據確山號張莽  
蕩三月己卯朔日中有黑子庚辰以朱勝非爲尚書右  
僕射兼中書侍郎辛巳葉夢得罷以盧益爲尚書左丞  
未拜復罷爲資政殿學士御營都統制王淵同簽書樞

密院事呂頤浩爲江南東路安撫制置使知江寧府壬午詔王淵免進呈書押本院文字扈從統制苗傅忿王淵驟得君劉正彥怨招降劇盜而賞薄帝在揚州闕宦用事恣橫諸將多疾之癸未傅正彥等叛勒兵向闕殺王淵及內侍康履以下百餘人帝登樓以傅爲慶遠軍承宣使御營使司都統制正彥渭州觀察使副都統制傅等迫帝遜位于皇子魏國公請隆祐太后垂簾同聽政是夕帝移御顯寧寺甲申尊帝爲睿聖仁孝皇帝以顯寧寺爲睿聖宮大赦以張澂兼中書侍郎韓世忠爲御營使司提舉一行事務前軍統制張俊爲秦鳳副總

管分其衆隸諸軍丁亥以東京留守杜克爲資政殿大學士節制京東西路殿前副都指揮使東京副留守郭仲荀進昭化軍節度使分竄內侍藍珪高邈張去爲張旦曾擇陳永錫于嶺南諸州擇已行傳追還殺之呂頤浩至江寧戊子以端明殿學士王孝迪爲中書侍郎盧益爲尚書左丞張俊部衆八千至平江張浚諭以決策起兵問罪約呂頤浩劉光世招韓世忠來會己丑改元明受張浚奏乞睿聖皇帝親總要務庚寅百官始朝睿聖宮以苗傅爲武當軍節度使劉正彥爲武成軍節度使劉光世爲太尉淮南制置使范瓊爲慶遠軍節度湖

北制置使楊惟忠加少保張浚爲禮部尚書及呂頤浩並赴行在傅等以御營中軍統制吳湛主管步軍司黃潛善汪伯彥並分司衡永州居住王孝迪盧益爲大金國信使進士黃太本吳時敏爲先期告請使置行在都茶場呂頤浩奏請睿聖皇帝復大位金人陷鄜州癸巳張浚命節制司參議官辛道宗措置海舶遣布衣馮輶持書說傅正彥甲午有司請尊太后爲太皇太后不許呂頤浩率勤王兵萬人發江寧乙未再貶黃潛善鎮東軍節度副使英州安置劉光世部兵會呂頤浩于丹陽丙申韓世忠自鹽城收散卒至平江張俊假兵二千戊

戊赴行在辛丑傅等以世忠爲定國軍節度使張俊爲  
武寧軍節度使知鳳翔府張浚責黃州團練副使郴州  
安置俊等皆不受傅等遣軍駐臨平拒勤王兵壬寅日  
中黑子沒盧益罷呂頤浩至平江水賊邵青入泗州癸  
卯太后詔睿聖皇帝宜稱皇太弟天下兵馬大元帥康  
王皇帝稱皇太姪監國賜傅正彥鐵券呂頤浩張浚傅  
檄中外討傅正彥執黃太本下獄乙巳太后降旨睿聖  
皇帝處分兵馬重事張俊率兵發平江劉光世繼之丙  
午張浚同知樞密院事翰林學士李邴御史中丞鄭穀  
並同簽書樞密院事呂頤浩張浚發平江丁未次吳江

奏乞建炎皇帝還卽尊位朱勝非召傅正彥至都堂議復辟傅等遂朝睿聖宮金人陷京東諸郡劉洪道棄青州去樅懶以劉豫知東平府節制河南州郡趙立復徐州夏四月戊申朔太后下詔還政皇帝復大位帝還宮與太后御前殿垂簾詔尊太后爲隆祐皇太后己酉詔訪求太祖神主以苗傅爲淮西制置使劉正彥副之庚戌復紀年建炎命張浚知樞密院事苗傅劉正彥並檢校少保呂頤浩張浚軍次臨平苗翊馬柔吉拒戰不勝傅正彥引兵二千夜遁辛亥皇太后撤簾呂頤浩等入見傅犯富陽新城二縣遣統制王德喬仲福追擊之癸

未朱勝非顏岐王孝迪張澂路允迪俱罷以呂頤浩爲  
尚書右僕射兼中書侍郎李邴尚書右丞鄭穀簽書樞  
密院事甲寅以劉光世爲太尉御營副使韓世忠爲武  
勝軍節度使御前左軍都統制張俊爲鎮西軍節度使  
御前右軍都統制勤王所僚屬將佐進官有差主管殿  
前司王元左言並責官英賀州安置樞密都承旨馬瑗  
停官永州居住吏部員外郎范仲熊浙西安撫司主管  
機宜文字時希孟並除名柳州吉陽軍編管斬中軍統  
制吳湛工部侍郎王世修于市贈王淵開府儀同三司  
乙卯大赦舉行仁宗法度應嘉祐條制與今不同者自

官制役法外賞格從重條約從寬罷上供不急之物元祐石刻黨人官職恩數追復未盡者令其家自陳許中外直言丁巳禁內侍交通主兵官及饋遺假貸借役禁兵干預朝政庚申詔尚書左右僕射並帶同中書門下平章事改門下中書侍郎爲參知政事省尚書左右丞以李邴參知政事詔行在職事官各舉所知併省館學寺監等官苗傅犯衢州癸亥以給事中周望爲江浙制置使丁卯帝發杭州留鄭穀衛皇太后以韓世忠爲江浙制置使及劉光世追討傅正彥己巳詔傅正彥苗謁苗翊張達不赦餘黨並原壬申立子魏國公莒爲皇太

子赦傳黨王鈞甫馬柔吉罪許其自歸丙子范瓊自光  
蘄引兵屯洪州是月劉文舜寇濠州西北賊薛慶襲據  
高郵軍五月戊寅朔帝次常州以張浚爲宣撫處置使  
以川陝京西湖南北路隸之聽便宜黜陟庚辰苗傅統  
領官張翼斬王鈞甫馬柔吉降辛巳次鎮江府遣祭張  
慤陳東墓詔恤其家癸未以翰林學士滕康同簽書樞  
密院事乙酉至江寧府駐蹕神霄宮改府名建康起復  
朝散郎洪皓爲大金通問使丁亥以徽猷閣直學士陳  
彥文提領水軍措置江浙防托召藍珪等速還朝己丑  
韓世忠追討傅正彥于浦城縣獲正彥傅遁走張浚撫

諭薛慶于高郵爲慶所留乙未浚罷以御營前軍統制  
王夔爲淮南招撫使己亥復置中書門下省檢正官省  
左右司郎中二員苗傅裨將江池殺苗翊降于周望傅  
走建陽縣土豪詹標執之以獻辛丑張浚還自高郵復  
命知樞密院事是月翟興擊殺楊進餘黨復推其徒劉  
可拒官軍六月戊申朔以東京留守杜克引兵赴行在  
命兼宣撫處置副使節制淮南京東西路己酉以久雨  
召郎官已上言闕政呂頤浩請令實封以聞遂用司勳  
員外郎趙鼎言罷王安石配享神宗廟庭以司馬光配  
王善攻淮寧府不克轉寇宿州統領王冠戰敗之甲寅

罷賞功司乙卯命恤死事者家且錄其後升浙西安撫使康允之爲制置使丙辰劉光世招安苗傅將韓侂戊午命江浙淮南引塘濼開畝澮以阻金兵庚申皇太后至建康府辛酉以久陰下詔以四失罪己一曰昧經邦之大略二曰昧戡難之遠圖三曰無綏人之德四曰失馭臣之柄仍榜朝堂徧諭天下使知朕悔過之意以帶御器械李質權同主管殿前司乙丑以建康府路安撫使連南天兼建康府宣徽太平等州制置使丁卯右司諫袁植請誅黃潛善及失守者權邦彥等九人詔朕方念咎責己豈可盡以過失歸於臣下遂罷植知池州以

趙鼎爲右司諫癸酉置樞密院檢詳官以右司郎中劉寧止爲沿江措置副使甲戌移御行宮乙亥詔諭中外以迫近防秋請太后率宗室迎奉神主如江表百司庶府非軍旅之事者並令從行朕與輔臣宿將備禦寇敵應接中原官吏民士家屬南去者有司毋禁金人陷磁州是夜賊貴仲正降秋七月戊寅贈王復爲資政殿學士己卯親慮囚辛巳苗傅劉正彥伏誅癸未進韓世忠檢校少保武勝昭慶軍節度使御營使司都統制范瓊自洪州入朝以瓊爲御營使司提舉一行事務後軍統制辛企宗爲都統制命學士院草夏國書大金國表本

付張浚甲申詔以苗劉之變當軸大臣不能身衛社稷  
朱勝非顏岐路允迪並落職張澂衡州居住以知廬州  
胡舜陟爲淮西制置使知江州權邦彥兼本路制置使  
金人犯山東安撫使劉洪道棄濰州遁萊州守將張成  
舉城降丁亥以范瓊跋扈無狀收下大理獄分其兵隸  
神武五軍皇太子薨諡元懿戊子鄭穀薨己丑以資政  
殿大學士王絢參知政事兵部尚書周望同簽書樞密  
院事庚寅仙井監鄉貢進士李時雨上書乞選立宗子  
係屬人心帝怒斥還鄉里辛卯升杭州爲臨安府壬辰  
言者又論范瓊逼遷徽宗及迎立張邦昌瓊辭伏賜死

子弟皆流嶺南劉洪道復青州執金守向大猷乙未遣謝亮使夏國丁酉遣崔縱使金軍前庚子張浚發行在辛丑王夔與靳賽遇合戰敗績壬寅命李邴滕康權知三省樞密院事扈從太后如洪州楊惟忠將兵萬人以衛以杜克同知樞密院事兼宣撫處置副使乙巳詔江西閩廣荆湖諸路團教峒丁槍杖手山東賊郭仲威陷淮陽軍翟興引兵入汝州與賊王俊戰敗之八月己酉移浙江安撫司于鎮江府庚戌李邴罷壬子以吏部尚書劉珪爲端明殿學士權同知三省樞密院事甲寅王庶罷以徽猷閣直學士知慶陽府王似爲陝西節制使

劉文舜入舒州己未太后發建康丁卯遣杜時亮使金  
軍前閏八月丁丑朔以胡舜陟爲沿江都制置使集英  
殿修撰王羲叔副之丁亥輔達掠漣水軍殺軍使郝璘  
率衆降于王瓊己丑以呂頤浩守尚書左僕射杜充守  
右僕射並同中書門下平章事庚寅起居郎胡寅上書  
言二十事呂頤浩不悅罷之辛卯命杜充兼江淮宣撫  
使守建康前軍統制王瓊隸之韓世忠爲浙西制置使  
守鎮江劉光世爲江東宣撫使守太平池州並受克節  
制丁酉太后至洪州己亥減福建廣南歲上供銀三之  
一詔制置使唯用兵聽便宜餘事悉禁壬寅帝發建康

復還浙西張俊辛企宗以其軍從甲辰次鎮江府賜陳東家金張浚次襄陽招官軍義兵分屯襄郢唐鄧以程千秋李允文節制是月知濟南府宮儀及金人數戰于密州兵潰儀及劉洪道俱奔淮南守將李逵以密州降金靳賽詣劉世光降九月丙午朔日有食之諜報金人治舟師將由海道窺江浙遣韓世忠控守圖山福山辛亥次平江府壬子金人陷單州興仁府遂陷南京執守臣凌唐佐降之癸丑以周望爲兩浙荆湖等路宣撫使總兵守平江翰林學士張守同簽書樞密院事命劉光世移屯江州丙辰遣張邵等充金國軍前通問使金人

陷沂州却高麗入貢使張浚承制罷知潭州辛炳起復直龍圖閣向子諲代之丁巳蠲諸路青苗積欠錢辛酉知鼎州邢侗坐結耶律余覲再責汝州團練副使英州安置癸亥賜宿泗州都大提舉使李成軍絹二萬匹成尋復叛己巳以胡舜陟爲宣撫司參謀官知鎮江府陳邦光爲沿江都制置使庚午以工部侍郎湯東野知平江府兼浙西制置使辛未追復鄒浩龍圖閣待制壬申夜潭州禁卒作亂謀竄不果向子諲隨招安之甲戌金帥婁宿犯長安經略使郭琰棄城遁河北賊鄴瓊圍光州冬十月丙子朔詔按察官歲上所發擿賊吏姓名以

爲殿最庚辰禁諸軍擅入川陝癸未帝至杭州復如浙  
東庚寅渡浙江郭仲威詣周望降望以仲威爲本司統  
制辛卯李成陷滁州殺守臣向子伋壬辰帝至越州癸  
巳命提舉廣西峒丁李械市馬邕州置牧養務戊戌初  
命東南八路歲收經制五項錢輸行在張浚治兵于興  
元府金人陷壽春府庚子陷黃州守臣趙令巖死之辛  
丑張浚以同主管川峽茶馬趙開爲隨軍轉運使專總  
四川財賦金人自黃州濟江劉光世引軍遁知江州韓  
柝棄城去金人自大冶縣趨洪州是月京西賊劉滿陷  
信陽軍殺守臣趙士負盜入宿州殺通判盛修己十一

月乙巳朔金人犯廬州守臣李會以城降王善叛降金  
金人執之丁未詔降雜犯死罪釋流以下囚聽李綱自  
便追復宋齊愈官貴仲正犯荆南兵馬鈐轄渠成與戰  
斬之戊申金帥兀朮犯和州守臣李儔以城降通判唐  
璟死之己酉張浚出行關陝兀朮陷無爲軍守臣李知  
幾棄城走壬子太后退保虔州江西制置使王子獻棄  
洪州走丁巳金人陷臨江軍守臣吳將之遁戊午遣孫  
悟等克金國軍前致書使金人陷洪州權知州事李積  
中以城降撫袁二州守臣王仲山王仲疑皆降淮賊劉  
忠犯蘄州韓世清逆戰破之忠入舒州殺通判孫知微

庚申金人陷真州守臣向子恣棄城去辛酉太后至吉  
州壬戌金人犯建康府陷溧水縣尉潘振死之癸亥金  
人陷太平州主管步軍司閻勅自西京奉累朝御容至  
行在詔奉安于天慶觀尋命勅節制淮西軍馬以拒金  
人甲子杜克遣都統制陳淬岳飛等及金人戰于馬家  
渡王瓊以軍先遁淬敗績死之乙丑以檢正諸房公事  
傅崧卿爲浙東防遏使太后發吉州次太和縣護衛統  
制杜彥及後軍楊世雄率衆叛犯永豐縣知縣事趙訓  
之死之金人至太和縣太后自萬安陸行如虔州丁卯  
十詔回浙西迎敵金人犯吉州守臣楊淵棄城走又陷

六安軍已巳帝發越州次錢清鎮庚午復還越州以周  
望同知樞密院事仍兼兩浙宣撫使守平江殿前都指  
揮使郭仲荀爲副使守越州右軍都統制張俊爲浙東  
制置使從行御史中丞范宗尹參知政事辛未兀朮入  
建康府守臣陳邦光戶部尚書李稅迎拜通判楊邦乂  
拒之癸酉帝如明州金人犯建昌軍兵馬監押蔡延世  
擊却之甲戌兀朮殺楊邦乂韓世忠自鎮江引兵之江  
陰軍江淮宣撫司潰卒李選攻陷鎮江淮西兵馬都監  
王宗望以濠州降于金是月張浚至秦州桑仲自唐州  
犯襄陽京西制置使程千秋敗走仲遂據襄陽十二月

乙亥朔張浚承制廢積石軍丙子帝至明州丁丑江淮  
宣撫司準備將戚方擁衆叛犯鎮江府殺守臣胡唐老  
辛巳金人陷常州守臣周杞遣赤心隊官劉晏擊走之  
陷廣德軍殺守臣周烈劉光世引兵趨南康軍壬午定  
議航海避兵禁卒張寶等憚行謀亂命呂頤浩等伏兵  
執寶等十七人斬之甲申張浚承制拜涇原經畧使曲  
端爲威武大將軍宣撫處置使司都統制乙酉兀朮犯  
臨安府守臣康允之棄城走錢塘縣令朱蹕死之己丑  
帝乘樓船次定海縣給行在諸軍雪寒錢辛卯留范宗  
尹趙鼎于明州以候金使癸巳帝次昌國縣乙未杜彥

犯潭州殺通判孟彥卿趙民彥金人屠洪州戊戌金人  
犯越州安撫使李鄴以城降衛士唐琦袖巨石要擊金  
帥琶八不克死之郭仲荀棄軍奔溫州庚子移幸溫台  
癸卯黃潛善卒于英州李成自滁州引兵之淮西

宋史卷二十五

宋史卷二十五考證

高宗紀二建炎三年壬子內侍鄭詢報金兵至帝被甲

馳幸鎮江府○

臣宗楷

按揮塵錄金人舉國南寇太

上駐蹕淮揚相距甚邇有招信尉以所部百餘人拒敵是日塵氛蔽日探騎得疾走乘輿百僚僅得南渡尉之姓名不傳於世或云姓孫

壬戌駐蹕杭州○

臣宗楷

按錢塘遺事宋太祖次陳橋

從仁和門入高宗過杭問縣名仁和喜曰此京師門名也遂駐蹕於此

宋史卷二十五考證

宋史卷二十六

元中書右丞相總裁脫脫等修

本紀第二十六

高宗三

四年春正月甲辰朔御舟碇海中乙巳金人犯明州張  
俊及守臣劉洪道擊却之丙午帝次台州章安鎮己酉  
遣小校自海道如處州問安太后庚戌金人再犯明州  
張俊引兵去浙東副總管張思政及劉洪道繼遁癸丑  
貶郭仲荀汝州團練副使廣州安置丙辰詔原兩浙州  
郡降金官吏丁巳婁宿陷陝州守臣李彥仙死之己未

金人陷明州夜大雨震電乘勝破定海以舟師來襲御  
舟張公裕以大舶擊退之辛酉發章安鎮壬戌雷雨又  
作甲子泊溫州港口乙丑以中書舍人李正民爲兩浙  
湖南江西撫諭使詣太后問安丁卯台州守臣晁公爲  
棄城遁處州衛兵及鄉兵相殺縱火肆掠三日劉可轉  
寇京西屢爲桑仲所敗至是爲其黨所殺復推劉超據  
荆門軍戊辰滕康劉珽罷仍奪職己巳換給僧度牒  
人輸錢十千辛未命臣僚條具兵退之後措置之策駐  
蹕之所是月金人攻楚州守臣趙立拒之金人犯邠州  
曲端遣涇原路副總管吳玠拒戰敗之于彭原又陷同

州張淡遣謝亮使夏國至則其主乾順已稱制遂還二月甲戌朔鄜瓊率衆降于劉光世叛將傅選詣處州乞降乙亥奉安祖宗神御于福州詔復以盧益爲資政殿學士李回端明殿學士並權知三省樞密院事金人陷潭州將吏王暎劉佶趙聿之戰死向子諲率兵奪門亡去金兵大掠屠其城丙子金人自明州引兵還臨安癸未虔州鄉兵首領陳新率衆數萬圍城叛將胡友亦犯虔州與新戰破之新乃去甲申禁迓卒投刺別軍丙戌金人自臨安退兵命劉光世率兵追之丁亥金人陷汴京權留守上官悟出奔爲盜所殺庚寅帝次溫州浙東

防邊使傅崧卿入越州辛卯金人陷秀州甲午知蔡州  
程昌寓棄城南歸鼎州民鍾相作亂自稱楚王乙未杜  
克罷丙申以金兵退肆赦張浚承制以陝西制置使王  
似知成都府罷諸路武臣提點刑獄李成入舒州金游  
騎至平江周望奔太湖守臣湯東野亦遁茶陵縣軍賊  
二千餘人犯郴州永興縣戊戌金人入平江縱兵焚掠  
辛丑白虹貫日鍾相陷澧州殺守臣黃宗權湖北制置  
使傅雱招諭孔彥舟彥舟聽命因以爲湖南北捉殺使  
荆南守臣唐懋棄城去金人陷醴州守臣王淑棄城去  
是月張浚自秦州引兵入援三月癸卯朔孔彥舟入鼎

州金人去平江統制陳思恭以舟師邀敗其後軍于太湖呂頤浩請幸浙西丙午趙鼎言金兵去未遠遂緩其行丁未命發運司說諭兩浙富民助米以備巡幸辛亥遣兵部員外郎馮康國等撫諭荆湖南北廣南諸路壬子金人入常州守臣周杞棄城去甲寅遣盧益及御營都統制辛企宗奉迎太后東還丙辰金人犯終南縣經略使鄭恩戰敗死之丁巳金人至鎮江府韓世忠屯焦山寺邀擊之詔侍從官各舉可充監司者一二人辛酉御舟發溫州宣撫司節制軍馬李允文部兵至鄂州御營前軍將楊勅叛甲子張浚請便宜辟官不許動改戊

辰孔彥舟擊敗鍾相擒相及其子子昂檻送行在己巳  
戚方陷廣德軍殺權通判王儔夏四月癸酉蠲江西州  
縣兵盜殘破民家夏稅戊寅吳玠及金人戰于邠州彭  
原店敗績部將楊晟死之己卯以觀文殿學士朱勝非  
爲江西湖南北宣撫使是日張浚引兵至房州知金兵  
退乃還癸未帝駐越州甲申下詔親征巡幸浙西韓世  
忠駐軍揚子江要金人歸路屢敗之兀朮引軍走建康  
乙酉以御史中丞趙鼎爲翰林學士鼎固辭不拜戚方  
圍宣州劉光世遣統制王德誘誅劉文舜于饒州丙申  
用趙鼎劾奏呂頤浩罷爲鎮南軍節度使醴泉觀使命

三省樞密院同班奏事韓世忠及兀朮再戰江中金人  
乘風縱火世忠敗績兀朮渡江屯六合縣丁酉復以趙  
鼎爲御史中丞戊戌振明州被兵民家己亥以張浚爲  
浙西江東制置使辛丑王德破妖賊王宗石于信州貴  
溪縣執其渠帥諸縣悉平是月金人犯江西者自荆門  
軍北歸留守司同統制牛臯潛軍寶豐擊敗之五月甲  
辰以范宗尹爲尚書右僕射兼御營使辛亥統領赤心  
隊軍馬劉晏及戚方戰于宣州敗死壬子金人焚建康  
府執李稅陳邦光而去淮南宣撫司統制岳飛邀擊于  
靜安鎮敗之是月紫微垣內有赤雲亘天白氣貫其中

癸丑詔臺諫等官各舉所知二人以張守參知政事趙鼎簽書樞密院事以白金三萬兩賜韓世忠軍贈戰歿將孫世詢嚴永吉張淵等官甲寅金人陷定遠縣執閻勅去勅不屈死之巨師古擊戚方于宣州數敗之方引去乙卯王絢罷丁巳命劉光世移軍捕戚方楊勅犯婺州戊午復置權尚書六部侍郎癸亥詔中原淮南流寓士人聽所在州郡附試甲子周望罷尋分司衡州居住置京畿淮南湖北京東西路鎮撫使乙丑升高郵軍爲承州以翟興孟汝趙立劉位趙霖李成吳翊李彥先薛慶並爲鎮撫使興河南府汝唐州立楚泗州漣水軍位

滁濠州霖和州無爲軍成舒蘄翊光黃州彥先海州淮陽軍慶承州天長軍丁卯慶及金人戰于承州城下累敗之戊辰命江浙州縣祭戰死兵民分江東西爲鄂州江州池州三路置安撫使罷諸路帥臣兼制置使諸州守臣兼管內安撫使是月劉超據荆南分兵犯峽州又合叛將彭筠犯復州淮西敗將崔增陷焦湖水砦河東北經制使王俊舉兵及金人戰于襄城縣敗之復潁昌府張浚承制以金房州隸利路六月辛未朔蠲紹興府三縣湖田米詔侍從臺諫諸將集議駐蹕事宜楊勅犯處州癸酉遣統制陳思恭討勅合江南兩路轉運爲都

轉運使再貶周望昭化軍節度副使連州安置甲戌罷御營司以范宗尹兼知樞密院事乙亥王瓊遣統領林閏等追襲楊勅于東陽縣軍敗裨將李在死之丁丑以劉光世部兵爲御前巡衛軍光世爲都統制楊勅等焚建州戚方犯湖州安吉縣詔張俊捕之戊寅更御前五軍爲神武軍御營五軍爲神武副軍以知建康府權邦彥爲淮南等路制置發運使滁濠鎮撫使劉位爲賊張文孝所殺命其子綱襲職庚辰置鎮撫使六人陳規德安府復州漢陽軍解潛荆南府歸陝州荆門公安軍程昌寓鼎澧州陳求道襄陽府鄧隨郢州范之才金筠房

州馮長寧淮寧順昌府蔡州辛巳慮囚申命有司討論  
釐正崇寧以來濫賞罷諸州添差通判職官癸未詔劉  
光世赴行在甲申岳飛破戚方于廣德軍乙酉鍾相僞  
將胡源引兵入慈利縣執其黨陳誠來降丙戌以呂頤  
浩爲建康路安撫大使劉光世爲兩浙路安撫大使朱  
勝非爲江州路安撫大使郭仲威爲真揚州鎮撫使戚  
方詣張俊降庚寅召韓世忠率兵赴行在辛卯妖賊王  
宗石等伏誅壬辰權密州都巡檢徐文率部兵泛海來  
歸甲午置樞密院幹辦官四員乙未郭仲威犯鎮江府  
遣岳飛擊之是月兀朮聞張浚在秦州將舉兵北伐自

六合引兵趨陝西秋七月癸卯劉光世援宣撫使例乞便宜行事不許詔軍興以來諸州得便宜指揮者並罷乙巳馮長寧復順昌府張浚罷曲端都統制丁未以劉光世爲集慶軍節度使開府儀同三司戊申以孔彥舟爲辰沅靖州鎮撫使張浚獻黃金萬兩助軍用宣撫司遣統制官呂世存王俊復鄜州其餘州縣多迎降後軍將王闢叛陷歸州鈐轄田祐恭擊敗之己酉王闢犯房州守臣韋知幾棄城走庚戌楊勅受劉光世招安尋復叛去迫泉州癸丑崔增犯太平州守臣郭偉拒却之乙卯金人徙二帝自韓州之五國城劉光世乞移司平江

不許丙辰張俊合諸將戚方等兵萬餘赴行在丁巳申  
命元祐黨人子孫于州郡自陳盡還當得恩數韓世忠  
張俊並罷己未禁閩廣淮浙海舶商販山東慮爲金人  
鄉導詔江浙福建州縣諭豪右募民兵據險立柵防遏  
外寇庚申以岳飛爲通秦州鎮撫使辛酉建州民范汝  
爲作亂命統制李捧捕之乙酉復李邦彥以下十九人  
官職聽自便復李綱銀青光祿大夫許翰顏岐端明殿  
學士張浚貶曲端階州居住丁卯金人立劉豫爲帝國  
號齊戊辰罷提領措置茶鹽司己巳詔王瓊部兵屯信  
州程昌寓遣將杜湛禽李合戎于松滋縣是月張用據

漢陽軍沿江措置副使李允文招降之以便宜徙鄂州  
路副總管以右軍統制馬友知漢陽軍八月辛未朔以  
禮部尚書謝克家參知政事壬申李成請降于江州詔  
撫納之張浚停程千秋官文州編管癸酉選神武中軍  
親兵六百人番直禁中甲戌詔侍從官日一員輪直進  
故事關治體者丁丑以韓世忠爲檢校少師武成感德  
軍節度使張俊檢校少保寧武昭慶軍節度使贈監察  
御史常安民爲左司諫江公望左諫議大夫錄其後二  
人庚辰太后至自虔州薛慶及金人戰于揚州城下死  
之郭仲威奔興化縣辛巳侍御史沈與求戶部侍郎李

陵以論宰相范宗尹皆黜宗尹復視事癸未盧益罷張  
浚復永興軍再貶曲端海州團練使萬州安置甲申陳  
萬信餘黨雷進作亂乙酉焚慈利石門二縣以御營司  
叅議官王擇仁權河東制置使山砦首領韋忠佺爲都  
統制宋用臣馮賽同都統制丙戌命李成吳翊捍禦上  
流翊棄城去以成爲四州鎮撫使命李捧便道過信州  
招捕靳賽戊子以饒信妖賊平赦二州徒以下囚蠲民  
今年役錢貶滕康永州劉珪衡州並居住己丑詔岳飛  
救楚州仍命劉光世遣兵往援辛卯杜湛渡江討羣賊  
復石首等五縣壬辰盜入梅州殺守臣沈同之大掠而

去癸巳命福建安撫使程邁會兵討范汝爲甲午知虢  
州邵興遣統制閻興及金人戰于解州東屢破之金人  
陷承州命陳思恭屯兵明州以防海道劉光世遣王德  
廓瓊以輕兵渡江乙未遇金游騎于召伯埭敗之戊戌  
以桑仲爲襄陽鄧隨郢州鎮撫使是月罷提舉廣西峒  
丁孔彥舟入潭州宣撫司參議官王以寧率兵拒之以  
寧敗遁去宣撫司主管機宜文字傅雱在彥舟軍中承  
制以彥舟權湖南副總管劉綱以乏食率兵奔溧陽九  
月辛丑呂頤浩入見請益兵命王玠巨師古顏孝恭兵  
隸之分屯境內壬寅詔諸路決囚甲辰徽宗皇后鄭氏

崩于五國城戊申命秦鳳將關師古領兵赴行在劉豫  
僭位于北京庚戌禁宣撫司僚屬便宜行事及京西湖  
南北路勿隸川陝宣撫司節制癸丑涇原同統制李彥  
琦及金人戰于洛河車渡敗之乙卯罷中書門下省檢  
正官桑仲陷均房州進犯白土關丙辰復增左右司郎  
官爲四員金人攻楚州趙立死之丁巳趙霖復和州李  
成遣馬進犯興國軍戊午荆襄賊趙延壽犯德安府陳  
規拒却之己未金均房安撫使王彥及桑仲戰于平麗  
縣敗之王闢詣彥降辛酉李捧擊范汝爲于建州官軍  
皆潰捧遁去金人犯揚州統制靳賽逆戰于港河敗之

金人陷延安府執呂世存又陷保安軍癸亥張浚遣都  
統制劉錫統五路兵及金將婁宿戰于富平縣浚駐邠  
州督戰官軍敗績丙寅給劉光世犒軍銀二萬兩絹二  
萬匹戊辰趙延壽焚郢州金人陷楚州鎮撫使李彥先  
求救兵敗死之冬十月庚午朔張浚斬環慶經略使趙  
哲于邠州貶劉錫合州安置命諸將各領兵歸本路浚  
退保秦州陝西大震辛未秦檜自楚州金將榘懶軍中  
歸于漣水軍丁禩水砦壬申命楊惟忠王玘討李成丙  
子以孔彥舟爲鼎澧辰沅靖州鎮撫使戊寅鍾相餘黨  
楊華舉兵圍桃源縣己卯馬進犯江州癸未程昌寓入

鼎州擊楊華破之甲申趣劉光世救楚州丁亥以李回  
同知樞密院事庚寅遣前御史臺檢法官謝嚮招范汝  
爲召張浚以兵入援追復李邦彥觀文殿大學士辛卯  
虔州賊李敦仁及弟世雄舉兵破虔州石城縣甲午命  
楊惟忠率兵屯江州乙未岳飛破金人于承州丙申詔  
劉光世節制諸鎮守禦通泰州伺便襲金人過淮是月  
馮長寧棄城去尋以淮寧附劉豫江東賊張琪犯建康  
府劉洪道招降之環慶路統制慕洵叛附于夏國涇原  
統制張中彥經略司幹辦趙彬叛降金人劉忠據岳州  
平江縣白面山王善餘黨祝友擁衆爲亂屯滁州龔家

城十一月癸卯募洧遂引金人圍環州呂頤浩復南康  
軍甲辰趙鼎罷乙巳秦檜入見丙午岳飛棄秦州渡江  
丁未金人犯秦州飛退保江陰軍沙上以御史中丞富  
直柔簽書樞密院事秦檜爲禮部尚書李允文殺岳州  
守臣袁植呂頤浩會楊惟忠與馬進戰南康軍不利戊  
申頤浩遣巨師古救江州爲進所敗師古奔洪州金人  
陷涇原經略使劉錡退屯瓦亭己酉以孔彥舟爲湖南  
副總管部兵屯潭州庚戌命神武副軍都統制辛企宗  
討范汝爲壬子日南至率百官遙拜二帝乙卯改樞密  
院幹辦官爲計議官丙辰金人陷秦州丁巳通州守臣

呂伸棄城去王彥攻桑仲于黃水破之房州平張浚以  
彥爲金均房州鎮撫使崔增犯池州劉洪道遣統制李  
貴擊走之增以兵萬餘詣呂頤浩降甲子詔諸路守臣  
節制管內軍馬丙寅金房州賊郭希犯歸州田祐恭擊  
郤之命王玿部兵萬人速援呂頤浩祝友渡江大掠是  
月張浚退軍興州秦鳳副總管吳玠收餘兵保大散關  
東和尚原詔諸路轉運司括借寺觀田租蘆場三年十  
二月庚午安南請入貢郤之辛未遣度支員外郎韓球  
括饒信諸州錢糧凡江湖川廣上供皆拘之壬申命孔  
彥舟援江州丙子禁節制軍馬守臣便宜行事丁丑馬

進分兵犯洪州乙丑李敦仁犯撫州崇仁縣命李山張中彥討之壬辰金人犯熙州總管劉惟輔戰敗之殺五千餘人甲午再犯熙州惟輔軍潰被執死之乙未以張俊爲江南招討使討李成丁酉范汝爲降詔補民兵統領是月張俊承制復海州團練副使曲端左武大夫興州居住是歲宣撫處置司始令四川民歲輸激賞絹三十三萬匹有奇

紹興元年春正月己亥朔帝在越州帥百官遙拜二帝不受朝賀下詔改元釋流以下囚復賢良方正直言極諫科蠲兩浙夏稅和買紬絹絲綿減閩中上供銀三分

之一戊申改命張俊爲江淮路招討使復江池路爲江  
東西路分荆湖江南諸州爲荆湖東西路置安撫司治  
池江鄂鼎州江南東西路各置轉運司荆湖東西路轉  
運司通掌兩路財賦以呂頤浩爲江東路安撫大使朱  
勝非江西路安撫大使馬進陷江州守臣姚舜明棄城  
走端明殿學士王易簡等二百人皆遇害己酉岳飛引  
兵之洪州金人犯揚州謝嚮率范汝爲討平建陽賊劉  
時舉金人犯秦州吳玠擊敗之庚戌又犯西寧州守臣  
俱重迎降辛亥謝克家罷壬子詔京官知縣並堂除內  
外侍從各舉可任縣令者二人犯賊連坐自今不歷縣

令者勿除監司郎官不歷外任者勿除侍從著爲令張  
中孚以原州叛降于金癸丑李敦仁圍建昌軍蔡延世  
率鄉兵擊退之賊曹成入漢陽軍李允文招之成入鄂  
州復趨江西丁巳呂頤浩遣王瓊崔增擊賊于湖口大  
敗之頤浩及楊惟忠引兵趨江州辛酉詔太祖創業垂  
統德被萬世神宗詔封子孫一人爲安定郡王世世勿  
絕自宣和末至今未舉有司其上應襲封人名依故事  
舉行金人再圍環州是月張浚復曲端榮州刺史提舉  
江州大平觀閩州居住尋移恭州二月戊辰朔宜章縣  
民李冬至二作亂犯英連韶郴諸州祝友降劉光世分

其軍以友知楚州庚午改行宮禁衛所爲行在皇城司  
李成黨邵友犯筠州守臣王庭秀棄城去辛未犯臨江  
軍守臣康倬遁壬申初定歲祀天地社稷如奏告之禮  
癸酉桑仲自棗陽引兵還襄陽丁丑鄜延將李永琦叛  
犯慶陽府戊寅禁州郡統兵官擅招安亂軍盜賊己卯  
日中有黑子四日乃沒以辛巳宗爲福建制置使辛巳  
以秦檜參知政事壬午水賊張榮入通州癸未詔辛巳  
宗及謝嚮罷遣范汝爲兵汝爲不聽命甲申詔王夔張  
俊掎角討捕馬進等賊丙戌復置祕書省己丑命孔彥  
舟呂頤浩張俊會兵討李成壬辰雨雹癸巳邵青寇宣

州丙申詔諸路提刑司以八月類省試張浚亦以便宜  
合川陝舉人卽置司類省試丁酉宣敎郎范壽坐誣訟  
孟忠厚且及太后除名潮州編管是月李敦仁犯汀州  
馬友遣其黨犯鄂州總管張用拒郤之李允文以友權  
湖南招捉公事友大掠漢陽而去過岳州守臣吳錫遁  
友據之三月戊戌朔以嚴衢二州守臣柳約李處勳有  
治効各進職一等呂頤浩遣崔增玉變合兵擊李成于  
湖口大敗之庚子張浚以富平之敗上疏待罪詔免壬  
寅禁諸路過糴丙午張俊楊沂中岳飛渡江擊馬進大  
敗之孔彥舟焚掠潭州趨衡州己酉李成犯饒州庚戌

張俊楊沂中復擊馬進于筠河敗之復筠州進奔江州  
男子崔紹祖詐稱越王中子受上皇詔爲天下兵馬大  
元帥趙霖以聞辛亥詔赴行在命劉光世兼淮南京東  
路宣撫使治揚州經畫屯田光世迄不行甲寅罷諸州  
免行錢乙卯金人破階州庚申劉超犯澧州統制杜湛  
率兵拒之甲子始下詔罪李成募人禽斬赦脅從者張  
俊追馬進至江州進戰敗遁去乙丑進復江州楊沂中  
趙密引兵追擊進又大敗之成奔蘄州振淮南京東西  
流民荆湖東路安撫使向子諲說降馬友與共討李冬  
至二平之是月金人攻張榮縮頭湖水砦榮擊敗之來

告捷劉光世以榮知泰州金人迫興州張浚退保閬州以端明殿學士張深爲四川制置使及參議軍事劉子羽趨益昌參謀官王庶爲龍圖閣待制知興元府兼利夔兩路制置使節制陝西諸路桑仲以其黨李道知隨州夏四月己巳張浚承制分利閬劔文政五州爲利州路置經略安撫使庚午張琪復叛犯當塗縣金將撻懶渡淮屯宿遷縣馬樂湖壬申太白晝見乙亥劉光世復楚州階州統領杜肇復階州馬友引兵入潭州戊寅杜琪棄澧州劉超入據之己卯金涇原帥趙彬犯耀州守臣趙澄擊走之淮賊寇宏犯濠州庚辰隆祐皇太后崩

癸未桑仲陷鄧州守將譚亮棄城走河東招捉使王俊引兵來援仲執斬之以其黨李橫知州事乙酉爲太后制暮年服辛卯羣臣三上表始聽政癸巳命向子諲發兵及廣西安撫許中同扼險要防孔彥舟入廣仍許脅從自新以招諭之是月京西賊李忠陷商州守臣楊伯孫棄城走呂頤浩遣統制閻臯通判建昌軍蔡延世襲擊李敦仁禽其弟世雄世臣五月丙辰朔蠲江西路被賊州縣賦稅丁酉詔呂頤浩朱勝非劉光世並兼淮南諸州宣撫使始奪李成官戊戌以張用爲舒蘄鎮撫使癸卯作大宋中興寶成金人犯和尚原吳玠擊敗之丙

年初復召試館職之制劉光世遣統制王德襲揚州執郭仲威以獻伏誅辛亥水軍統制邵青叛圍太平州趙彬及金人合兵圍慶陽府守臣楊可昇擊敗之甲寅命知南外宗正事令應選年幼宗子將育于宮中詔收者戶長役錢己未詔州縣因軍期徵取民財物者立式榜示禁過數催擾庚申孔彥舟引衆過潭州馬友迎擊大敗之彥舟趨岳州犯鄂州李允文以彥舟爲湖東副總管屯漢陽辛酉以直秘閣宗綱爲荆南鎮撫使措置營田官樊賓爲副壬戌劉光世招降邵青趙延壽據分寧縣呂頤浩招降之是月張俊及李成戰于黃梅縣殺馬

進成敗遁歸劉豫李忠譚亮各率兵歸張浚浚命王庶分其兵張用復叛寇江西岳飛招降之湖州進士吳木上書論宰執送徽州編管六月己巳始鬻承直修武郎以下官壬申冊諡皇太后曰昭慈獻烈甲戌張琪犯餘杭州又犯宣州乙亥月犯心庚辰湖賊楊華楊廣犯鼎州程昌寓拒郤之上虞縣丞婁寅亮上書請選立繼嗣壬午權橫昭慈獻烈皇后于越州張琪犯徽州守臣郭東棄城去琪入據之癸未張浚引大兵至瑞昌縣之丁家洲李允文自鄂部兵歸浚浚并其兵護允文赴行在邵青率舟師至鎮江甲申復叛去丁亥崇安民廖公昭

合范汝爲餘黨熊志寧作亂衆旣散志寧復與建陽民  
丁朝佐合兵陷二縣戊子慮囚己丑邵青犯江陰軍之  
福山遣海州鎮撫使李進彥中軍統制耿進率舟師會  
劉光世討之南安賊吳忠宋破壇劉洞天作亂庚寅江  
西提刑司遣官討之破壇洞天皆伏誅忠遁去癸巳熙  
河統制關師古洮東安撫郭玠同討熙州叛兵連敗之  
甲午廣賊鄧慶龔富圍南雄州守臣鄭成之率兵民以  
拒獨建劔汀州邵武軍租是月知虢州邵興屯盧氏縣  
爲河南統制董先所破走興元先遂取商虢二州張浚  
承制以吳玠爲陝西諸路都統制時關隴六路盡陷止

餘階成岷鳳洮五郡鳳翔之和尚原隴州之方山原黏罕既得陝西地悉與僞齊秋七月乙未朔以馬友權荆湖東路副總管趣討孔彥舟統制潘達後軍將胡江等叛破玉山弋陽永豐三縣遣樞密院準備將領徐文討之戊戌吳錫復入邵州庚子以岳飛爲神武右副軍統制留軍洪州彈壓盜賊辛丑封伯右武衛大將軍令詔爲安定郡王壬寅虔州賊陳顥作亂命趣捕之甲辰詔秘書省長貳通修日歷丙午劉光世遣將喬仲福擊邵青于常熟爲所敗撻懶自宿遷北歸戊申韓世清追襲張琪復祈門縣庚戌張俊執傅雱赴行在張浚以曲端

屬吏以武臣康隨提點夔路刑獄與王庶雜治之辛酉  
召呂頤浩赴行在張琪犯饒州頤浩遣閻臯擊敗之琪  
黨姚興降琪走徽州癸亥范宗尹罷是月珍州守臣李  
玠棄城去王彥數擊敗李忠趙彬來歸張浚承制以彬  
爲陝西轉運使又以涇原兵馬都監李彥琪爲本路副  
總管彥琪尋叛去八月丙寅以孔彥舟爲蘄黃鎮撫使  
丁卯以知潭州吳敏爲荆湖東西廣南路宣撫使張浚  
殺曲端于恭州獄張用部兵至瑞昌歸張浚浚以用爲  
本軍統制戊辰張守等上紹興重修勅令格式癸酉復  
以汪伯彥爲江東安撫大使乙亥呂頤浩遣將李鑄復

舒州丁丑祔昭慈獻烈皇后神主于溫州太廟戊寅張  
守罷以李回參知政事富直柔同知樞密院事庚辰杜  
湛及劉超戰于彭山爲所敗辛巳超及楊華楊廣合兵  
復寇鼎州程昌寓遣湛率舟師擊敗之遣辛企宗移軍  
福州討熊志寧胡江等諸賊韓世清及張琪戰世清敗  
琪復入祈門縣壬午命張俊遣兵捕之鑄紹興錢癸未  
詔許邵青張琪脅從徒黨自新乙酉以李成在順昌恐  
復謀亂遣使齎蠟書諭淮寧蔡州將士立賞格募人禽  
斬成丁亥以秦檜爲尚書右僕射同中書門下平章事  
兼知樞密院事庚寅復李綱資政殿大學士募人往京

東河南伺察金齊動止仍齎詔慰撫忠義保聚之人蔡州鎮撫使范福棄城去以土豪李祐代之辛卯蠲徽州被賊民家夏稅壬辰置三省樞密院賞功房是月知鄂州曹成掠湖西犯沅州與知復州李宏合屯瀏陽旣而攻宏宏奔潭州九月甲午朔張琪黨李捧犯宣州守臣李彥卿及韓世清擊却之詔江東西路安撫使復治建康府洪州以王瓊知池州楊惟忠知江州並兼管內安撫使率部兵赴官丙申斬李世臣己亥以資政殿學士葉夢得爲江南東路安撫大使兼壽春等六州宣撫使庚子張琪復陷宣州己乃遁去辛丑命王瓊討琪丁未

詔歲再遣使省謁諸陵因撫問河南將士命馬友移屯鄂州庚戌命宗室右監門衛大將軍士芑朝饗溫州太廟辛亥合祭天地于明堂太祖太宗並配大赦罷諸州守臣節制軍馬錄用元符末上書人子孫癸丑復以呂頤浩爲尚書左僕射同中書門下平章事兼知樞密院事丁巳王彥破李忠于秦郊店忠奔歸劉豫戊午禁福建轉運司抑民出助軍錢落范宗尹觀文殿學士己未初措置河南諸鎮屯田以戶部尚書孟庾爲江東西湖東等路宣諭制置使辛酉詔四方有建策能還兩宮者實封以聞有効者賞以王爵壬戌遣御史胡世將督捕

福建盜賊是月長星見冬十月乙丑詔蔡京王黼門人  
實有才能者公舉叙擢李回罷丙寅朱勝非分司江州  
居住丁卯以李允文恣睢專殺賜死大理獄己巳王德  
招邵青降之庚午以孟庾參知政事徽猷閣直學士湯  
東野爲江淮發運使劉洪道招降李捧董旺壬申置行  
在大宗正司癸酉兀朮攻和尚原吳玠及弟璘力戰大  
敗之兀朮僅以身免丁丑增置諸路武尉戊寅以張俊  
爲太尉移屯婺州壬午初置見錢關子招人入中以給  
軍食范汝爲復叛入建州守臣王浚明棄城走辛企宗  
退屯福州甲申劉超請降以超守光州戊子崔紹祖伏

誅詔邵青以舟師赴行在己丑升越州爲紹興府李成  
軍正李雱伏誅知承州王林禽張琪于楚州檻送行在  
壬辰錄程頤孫易爲分寧令癸巳范汝爲犯邵武軍守  
臣吳必明統制李山率兵拒之衆潰退保光澤縣關師  
古復秦州獲郭振是月劉豫遣將王世冲寇廬州守臣  
王亨大破之斬世冲曹成及馬友戰于潭州成敗還攸  
縣王才遣將丁順圍濠州劉光世遣兵攻橫澗山順解  
圍去十一月乙未葉夢得至建康以詔招王才降之丙  
申遣內侍撫問孔彥舟桑仲丁酉榜諭福建江東羣盜  
赦其脅從者戊戌詔移蹕臨安以孟庾爲福建江西荆

湖宣撫使神武左軍都統制韓世忠副之仍命械謝嚮  
陸棠赴行在己亥以婁寅亮爲監察御史范汝爲犯光  
澤縣李山走信州辛丑續編紹興太常因革禮桑仲請  
正劉豫惡逆之罪詔進幸荆南乙巳以右司諫韓璜黨  
富直柔責監潯州稅張琪伏誅庚戌富直柔罷荆湖廣  
西宣撫使吳敏始受命置司柳州辛亥升康州爲德慶  
府壬子詔內外侍從各舉所知三人丙辰程昌寓遣杜  
湛擊楊華敗之命張浚遣使持詔招曹成以所部赴行  
在己未楊華請降辛酉命吏部侍郎李光節制臨安府  
內外諸軍壬戌曹成犯安仁縣執安撫使向子諲進攻

道州是月前知鄜州李惟德以岷州來歸吳玠始遣人  
通書夏國十二月乙丑吳敏罷丙寅復置樞密院都承  
旨范汝爲遣葉澈寇南劔州守臣張翬拒戰大破之己  
巳遣吏部侍郎傅崧卿爲淮東宣諭使甲戌遣江東安  
撫司統制郝晏顏孝恭討建昌軍賊乙亥辛企宗罷仍  
追三官率兵赴軍前自效丁丑蠲諸路在官積欠詔官  
戶名田過制者與民均科以岳飛爲神武副軍都統制  
部兵屯洪州曹成陷道州守臣向子恣棄城走戊寅以  
彗出求直言增行在職事官職錢遣駕部員外郎李愿  
撫諭川陝己卯詔兩浙分東西路置提點刑獄庚辰桑

仲遣兵寇復州守臣俎適棄城去辛巳復置廣西提舉  
茶鹽司知海州薛安靖殺僞都巡檢使王企中率軍民  
以城來歸增諸路酒錢以備軍費甲申知龍州范綜統  
制雷仲舉兵復水洛城己丑起復陝西都統制吳玠爲  
鎮西軍節度使詔江西安撫司趣兵討捕吳忠是月劉  
豫遣將王彥充攻壽春府桑仲遣李橫復寇金州王彥  
拒戰于馬郎嶺大破之均州平蔡州褒信縣弓手許約  
叛據光州階州安撫孫注復洮州龔富等圍南劔州

宋史卷二十七

元中書右丞相總裁脫脫等修

本紀第二十七

高宗四

二年春正月癸巳朔帝在紹興府率百官遙拜二帝不受朝賀甲午詔復置賢良方正直言極諫科丙申賜楊邦乂謚曰忠襄韓世忠圍建州丁酉蠲諸路元年逋稅庚子陝西叛將白常圍岷州關師古率兵破之辛丑韓世忠拔建州范汝爲自焚死斬其二弟餘黨悉平壬寅帝發紹興曹成釋向子誣丙午帝至臨安府壬子遣韓

世清捕石陂賊癸丑以張俊檢校少保定國軍節度使  
劉豫遣兵犯伊陽縣翟興及其將李恭合擊敗之曹成  
犯郴州永興縣己未修臨安城辛酉遣內侍任源撫問  
張浚江西副總管楊惟忠以楊勅雖就招安復謀作亂  
誘誅之二月甲子楊華復叛擾鼎澧潭三州詔立賞禽  
捕首領赦貸脅從丙寅命劉光世將銳卒萬人屯揚州  
經理淮東庚午以李綱爲觀文殿學士湖廣宣撫使仍  
命岳飛率馬友李宏韓京吳錫等共討曹成諸盜甲戌  
以吏部尚書李光爲淮西招撫使王夔副之乙亥雨雹  
丙子以施達謝嚮陸棠黨范汝爲達除名婺州編管嚮

棠械赴行在俱道死丁丑分崔增李捧邵青趙延壽李  
振單德忠徐文所部兵爲七將名御前忠銳軍隸步軍  
司非樞密奉旨不許調遣減淮南營田歲租三之二俟  
三年復舊己卯劉光世入見同執政對內殿諭以進屯  
揚州光世迄不行庚辰詔監司避本貫壬午程昌寓遣  
杜湛募兵攻賊周倫破之甲申以工部員外郎滕茂實  
死節于代州贈龍圖閣直學士丙戌初置著作官二員  
修日歷己丑復荆湖東西爲荆湖南北路南路治潭北  
路仍治鄂申禁福建路私有私造兵器是月知商州董  
先叛入劉豫金人陷慶陽府執楊可昇降之三月壬辰

朔命襄鄧鎮撫使桑仲收復陷沒諸郡仍命諸鎮撫使  
互相應援再貶徐秉哲惠州吳玠南雄州莫儔韶州並  
居住水賊翟進襲漢陽軍殺守臣趙令幾李光執韓世  
清于宣州以歸虔化縣賊李敦仁及其徒皆授官隸諸  
軍乙未復置江陰軍罷福建路武尉戊戌葉夢得罷以  
李光爲江東安撫大使兼滁濠等六州宣撫使罷江淮  
發運司桑仲如郢州調兵守將霍明以仲將謀逆殺之  
以其事聞庚子金人攻方山原陝西統制楊政援之金  
兵引去辛丑又犯隴安縣吳璘等擊走之淮南營田副  
使王寔括閒田三萬頃給六軍耕種丙午復置中書門

下省檢正官省樞密院檢詳官己酉以神武右軍中部  
統制楊沂中爲神武中軍統制癸丑河南鎮撫使翟興  
爲部將楊偉所殺甲寅金人復自水洛城來攻楊政等  
又敗之庚申曹成寇賀州清水砦守臣劉全棄城去是  
月知壽春府陳卞及鈐轄陳寶等舉兵復順昌府尋引  
兵歸爲僞齊所逐并壽春失之夏四月甲子曹成陷賀  
州陳顥圍循州焚龍川縣命江西安撫司遣將捕之丙  
寅賜禮部進士張九成以下二百五十九人及第出身  
庚午以翰林學士承旨翟汝文參知政事壬申釋福建  
諸州雜犯死罪以下囚江西軍賊趙進寇瑞昌縣楊惟

忠討降之戊寅僞齊統領王資率兵來歸富順監男子李勃僞稱徐王召赴行在壬午詔內外侍從監司守臣各舉中原流寓士大夫三二人以備任使癸未詔曰朕登庸二相倚遇惟均其所薦用之人不得偏私離間朋比害政謚孫傳曰忠定乙酉李綱始拜命置司福州是夜太平州軍士陸德據城叛囚守臣張錞殺當塗縣令鍾大猷戊子命呂頤浩都督江淮荆浙諸軍事庚寅劉豫徙居汴京是月王彥大破董先于馬嶺關復商州閏月癸巳高麗遣使入貢乙未知池州王進討陸德誅之丙申岳飛擊破曹成于賀州置都督府隨軍轉運司丁

酉左朝奉郎孫覲坐前知臨安府贓污貸死除名象州  
羈管罷後苑工作辛丑韓世清以狂悖伏誅丙午岳飛  
敗曹成于桂嶺縣成走連州遣統制張憲追擊破之又  
走郴州入邵州丁未賜福建宣撫司賞軍錢十萬緡聽  
朱勝非自便乙卯詔諸鎮撫使非奉朝旨毋擅出兵劉  
光世聞父喪去官特命起復己未詔自今明堂專祀昊  
天上帝以太宗配是月張浚命利夔制置使王庶與知  
成都府王似兩易其職襄鄧副都統制李橫同副都統  
制李道合兵圍郢州霍明遁去五月辛酉以兵部尚書  
權邦彥簽書樞密院事以樞密將領趙琦所部兵爲忠

銳第八將癸亥呂頤浩出師以神武後軍及忠銳兩將  
從行百官班送甲子以霍明權襄鄧隨郢州鎮撫使詔  
觀察使已上各薦可備將帥者二人丁卯罷兩浙轉運  
司回易庫己巳廢紹興府餘姚上虞縣湖田爲湖漑民  
田庚午詔修建康行宮辛未選宗室子偁之子伯琮育  
于禁中丙子呂頤浩總師至常州前軍將趙延壽兵叛  
于呂城鎮丁丑延壽犯金壇縣殺知縣胡思忠頤浩稱  
疾不進戊寅海州賊王山犯漣水軍總領蘇復副統制  
劉靖會兵擊敗之庚辰臨安府火癸未置御前軍器所  
甲申親慮囚自是歲如之罷行在權官乙酉劉光世遣

王德追趙延壽叛兵至建平縣悉誅之丙戌置脩政局  
命秦檜提舉詔侍從臺省寺監官監司守令條具省費  
裕國彊兵息民之策丁亥以中書門下省檢正官仇愈  
爲沿海制置使戊子手詔用建隆故事命百官日輪一  
人轉對兩浙轉運副使徐康國獻銷金屏障詔有司毀  
之奪康國二官蠲太平州被賊之家夏稅是月張浚以  
參贊軍事劉子羽知興元府黜王庶復以王似知成都  
府韓世忠至洪州遣董旼招曹成成聽命赴行在六月  
庚寅朔李宏引兵入潭州執馬友殺之甲午李綱領兵  
三千發福州戊戌詔孟庾韓世忠班師岳飛屯駐江州

庚子以劉光世爲寧武寧國軍節度使韓世忠爲太尉  
移屯建康府辛丑以李橫爲襄郢鎮撫使李道鄧隨鎮  
撫使壬寅翟汝文罷孔彥舟叛降僞齊乙巳以權邦彥  
兼權參知政事戊申仇愈兼制置福建路辛亥免臺諫  
官輪對甲寅召呂頤浩赴行在令參謀官傅崧卿權主  
管都督府事詔兩浙江淮守臣令存撫東北流寓人乙  
卯韓世忠遣統制解元巨振入潭州執李宏以歸秋七  
月辛酉悉蠲福建諸州被兵之家田稅壬戌復置湖北  
提舉茶鹽司甲子罷福建提舉市舶司己巳起復翟琮  
爲河南府孟汝唐州鎮撫使甲戌罷淮東路提點刑獄

司丙子馬友黨郝通率兵五萬歸宣撫司戊寅知廬州  
王亨復安豐壽春縣己卯呂頤浩入見庚辰韓世忠討  
劉忠駐兵于岳州之長樂渡大破之忠走淮西丁亥詔  
編次建炎以來譜牒八月壬辰以孟庾兼權同都督江  
淮荆浙諸軍事癸未順昌縣賊余勝等作亂通判南劍  
州王元鼎捕殺之甲午安定郡王令話薨丙申詔郡守  
除罷赴闕皆得引對臨安府火以知江州劉紹先爲沿  
淮防遏使戊戌命朱勝非提舉醴泉觀兼侍讀日赴朝  
堂議事沿海州縣籍民海舶每歲一更守海道險要振  
福建饑民己亥停傳雋官英州羈管庚子詔孟庾韓世

忠總大兵至建康進赴行在戊申給事中胡安國以論  
朱勝非罷宰執臺諫上疏留之皆不報江西統制傅樞  
討平南雄賊張忠鄧慶劉軍一等己酉賜吳玠田甲寅  
秦檜罷給事中程瑀等坐論駁朱勝非疑其黨檜並落  
職主宮觀彗出胃乙卯減膳戒輔臣脩闕政罷脩建康  
行宮九月戊午朔落秦檜職己未罷修政局辛酉以彗  
出大赦許中外臣民直言時政陝西諸叛將許令自新  
壬戌王倫自金國使還入見遣潘致堯等爲金國軍前  
通問使附茶藥金幣進兩宮甲子以直徽猷閣郭偉爲  
淮西巡撫使乙丑復以朱勝非爲尚書右僕射同中書

門下平章事兼知樞密院事戊辰司空山賊李通出降以爲都督府親軍統領癸酉以右朝請大夫呂源爲浙東福建沿海制置使治定海縣知建昌軍朱芾擊石陂賊余照禽斬之甲戌彗沒丙子復以郭仲荀爲武泰軍節度使詔墨勅有不當者許三省樞密院奏稟給事中中書舍人繳駁臺諫論列有司申審庚辰命福建提舉茶鹽官兼領市舶司辛巳以韓世忠爲江南東西路宣撫使他帥臣稱宣撫使者並罷壬午遣監察御史明橐等五人宣諭江浙湖廣福建諸路仍降詔諭官吏以遣使按察勸懲誅賞之意癸未新作行宮南門成甲申提

轄權貨務張純浚立淮浙鹽法增其算總領四川財賦  
趙開初變四川鹽法盡權之乙酉太白晝見丙戌以知  
興元府王似爲川陝宣撫處置副使丁亥封右監門衛  
大將軍榮州防禦使令時爲安定郡王是月韓世忠遣  
統制解元襲擊劉忠于蘄陽大破之忠奔劉豫冬十月  
戊子朔置牧馬監于饒州庚寅李勃伏誅丙申初置江  
浙荆湖廣南福建路都轉運使甲辰潘致堯至楚州通  
判州事劉晏劫其禮幣奔劉豫守臣柴春戰死戊申以  
知平江府趙鼎爲江東安撫大使丙辰禁温台二州民  
結集社會班度量權衡于諸路禁私造者是月顏孝恭

招降石陂餘賊李寶等十一月辛酉陳顥陷汀州武平縣犯梅循二州乙丑初權明州鹵田鹽辛未議將撫師江上召侍從官條具利害甲戌命李綱劉洪道程昌寓解潛會兵捕討胡寇楊太戊寅范汝爲餘黨范忠掠龍泉縣庚辰詔宣諭五使焚所至州縣建炎以前已蠲稅籍癸未臨安大火是月關師古敗僞齊兵于抹邦山馬友黨步諒詣李綱降綱入潭州其黨郝晷降王進吳錫禽王浚湖南盜賊悉平十二月丁亥朔命神武前軍統領申世景等討捕范忠己丑僞稱榮德帝姬易氏伏誅范忠犯處州巨師古引兵入廬州執王亨送行在甲午

李綱罷臨安府火丙申振被火家罷浙東沿海制置司  
丁酉岳飛遣統領徐慶王貴討禽萍鄉賊高聚己亥以  
胡舜陟爲廬壽等州鎮撫使金人侵熙秦關師古擊敗  
之庚子遣駕部員外郎李愿撫諭川陝江西兵馬副鈐  
轄張中彥坐縱暴不法斬于潭州辛丑程昌寓遣杜湛  
討楊欽等敗之殺三千餘人癸卯川陝宣撫司類試陝  
西發解進士得周謨等十三人以便宜賜進士出身甲  
辰罷張浚宣撫處置使仍知樞密院以知夔州盧法原  
爲川陝宣撫處置副使及王似同治司事己酉遣司封  
員外郎周隨亨同撫諭川陝庚戌孟庾自建康來朝辛

亥金人犯商州守將邵隆退屯上津李橫敗僞齊兵復  
汝州甲寅命孟庾同都督江淮荆浙諸軍事詔都督府  
總治江東西湖北浙西帥臣經畫屯田張浚承制以歸  
州隸夔州路是冬金人犯和尚原將士乏食自潰吳璘  
拔砦棄去虔賊謝達犯惠州

三年春正月丁巳朔帝在臨安幸百官遙拜二帝不受  
朝賀江西將李宗諒誘戍兵叛寇筠州統領趙進擊邵  
之翟琮入西京禽僞齊留守孟邦雄命諸路憲臣兼提  
舉常平司庚申金人犯上津李橫破穎順軍僞齊知軍  
蘭和降壬戌金人犯金州洵陽縣以仇忿爲福建兩浙

淮東路沿海制置使癸亥陳顥圍潮州不下引兵趨江  
西甲子李橫復穎昌府乙丑詔中外刑官各務仁平臺  
憲檢察月具所平反以聞歲終考察殿最金人陷金州  
鎮撫使王彥焚積聚退保西鄉庚午罷行在宗正司命  
嗣濮王仲湜兼判大宗正事辛未震雷雨雹造渾天儀  
李通爲其徒王全所殺壬申命西外宗正移司福州癸  
酉復祭大火以湯東野爲淮東安撫使乙亥以李橫爲  
襄陽府鄧隨郢州鎮撫使丁丑登萊山砦統制范溫率  
部兵泛海來歸庚辰詔春秋望祭諸陵張浚論奏王似  
不可爲副因引罪求罷不報癸未詔民復業者視墾田

多寡定租額賦役乙酉減淮浙蠶鹽錢二月丁亥朔升  
桂州爲靜江府己丑權邦彥薨浙東賊彭友犯龍泉縣  
辛卯李通餘黨劉德圍舒州吳玠遇金人于饒風關王  
彥自西鄉來會金人分兵攻關統制郭仲敗走丁酉饒  
風關破玠趣西縣彥奔達州四川大震張浚被罷職之  
命以諸軍方潰因秘不行復具奏審己亥金帥撒離曷  
入興元府經畧使劉子羽焚其城走三泉縣吳玠退屯  
仙人關庚子以宗子伯琮爲和州防禦使賜名瑗尋改  
貴州辛丑蠲廣東諸州被賊民家稅壬寅鄭州兵馬鈐  
轄牛臯彭玘率兵與李橫會橫以便宜命臯爲蔡唐州

鎮撫使玘知汝州乙巳翟琮遣統制李吉敗偽齊兵于伊陽又殲其將梁進之衆丁未王似始受宣撫副使之命戊申虔賊周十隆犯循梅汀州詔統制趙祥等合兵捕之庚戌以李橫爲神武左軍副統制京西招撫使改胡舜陟爲淮西安撫使辛亥以工部尚書席益參知政事翰林學士徐俯簽書樞密院事壬子王全犯廬州甲寅詔守臣至官半年具上民間利害或邊防五事李橫遣人奏穎昌之捷詔許橫便宜行事乙卯劉光世遣鄺瓊等屯兵泗州爲李橫聲援是月張浚復以王庶爲參謀官往巴州措置時金兵深入至金牛鎮疑有伏由褒

斜谷引兵還興元吳玠劉子羽追擊其後殺獲甚衆三月己未詔岳飛捕虔賊壬戌申命統制巨師古部兵萬人屯揚州胡舜陟至廬州王全降甲子以趙鼎爲江西安撫大使李橫傳檄諸軍收復東京己巳金人遣兵援劉豫李橫敗走穎昌復陷壬午以韓世忠爲淮南東路宣撫使李綱遣兵擊降李宗諒詔戮于市夏四月丁亥朱勝非以母喪去位僞齊知虢州董震及其統制董先來歸以震權商號陝州鎮撫使己丑詔江東西湖北浙西募民佃荒田蠲三年租辛卯以劉光世爲檢校太傅江南東路宣撫使金人去興元壬辰徙都督府于鎮江

岳飛軍次虔州甲午僞齊知唐州胡安中來歸丙申僞齊李成攻陷虢州董先牛皐犇襄陽己亥改諡昭慈獻烈皇后爲昭慈聖獻復舉五帝日月之祀庚子增文武小官奉辛丑荆南統制羅廣率兵至鼎州楊太衆益盛自號大聖天王立鍾相少子子義爲太子廣等不克討而還丁未岳飛遣統領張憲王貴擊彭友禽斬之劉忠爲部下王林所殺傳首行在戊申以浙西兵馬鈐轄史康民所部兵爲忠銳第九將己酉張浚奏王庶王似盧法原威望素輕乞命劉子羽吳玠並爲判官不報辛亥徐文叛奔僞齊五月丙辰以翟琮爲河南府孟汝鄭州

鎮撫使董先爲副使丁巳遣樞密計議官任直清撫諭襄陽商號河南諸鎮己未命楊沂中招捕嚴州盜賊辛酉建睦親宅以董先爲商號陝州鎮撫使徵河南布衣王忠民爲宣教郎至行在辭不受壬戌潘致堯還言金人欲重臣通使以取信遂寢出師之議乙丑罷諸州在任守臣所辟通判丁卯以韓肖胄等充金國軍前通問使安化蠻犯邊廣西經畧使許中發兵擊之戊辰楊沂中招降嚴州賊繆羅等捕斬其徒百人魔賊平庚午以岳州數被兵免今年稅役壬申詔守令尉佐境內妖民聚集不能覺察致亂者並坐罪知建昌軍朱芾討南豐

縣賊禽誅其魁黃琛乙亥以方與金國議和禁邊兵犯齊境丙子王彥復金州金兵棄均房去韓世忠請以大軍還鎮江己卯詔淮南統制解元戌泗州餘屯江北周隨亨李愿宣押王似盧法原至闕州張浚始解使事時已論金牛之功以吳玠爲利州路階成鳳州制置使劉子羽爲寶文閣直學士王彥爲保大軍承宣使僚屬將帥第賞有差庚辰浚及子羽王庶劉錫等赴行在詔李橫等收軍還鎮辛巳罷宣撫司便宜黜陟六月甲申朔統制巨師古坐違韓世忠節制除名廣州編管丙戌復置六部架閣庫丁亥禁諸路招納淮北人及中原軍來

歸者戊子復元祐宰相呂大防官職贈諡庚寅詔降川  
陝死罪囚釋流以下賞吳玠關師古將士壬辰張浚至  
綿州復奏王似不可任甲午命王夔率諸軍討楊太己  
亥罷沿海制置司丁未置國子監及博士弟子員戊申  
以王林所部兵爲忠銳第十將己酉岳飛自虔州班師  
辛亥發兵屯虔虔廣二州彈壓盜賊州各三千人是月  
金人圍方山原王似命吳玠發兵救之秋七月己未復  
置博學宏詞科初許任子就試甲子以久旱償州縣和  
市民物之直丁卯詔訪求累朝勲臣曹彬等三百人子  
孫以備錄用戊辰王夔以舟師發行在己巳詔減膳禁

屠弛工役罷苛燒命兩浙及諸路憲臣親按部錄囚辛未蠲紹興二年和市絕帛癸酉呂頤浩等以旱乞罷政帝賜詔曰與其去位曷若同寅協恭交修不逮思所以克厭天心者頤浩等乃復視事乙亥朱勝非起復丙子泉州水溢壞城丁丑遣中使逆趣張浚于道是月四川霖雨地震八月己丑詔岳飛赴行在留精兵萬人戊江州翟琮率兵突圍犇襄陽詔屯駐其地癸卯罷諸路輪禁軍闕額錢甲辰以雨暘不時蘇湖地震求直言乙巳復置史館修撰直館檢討官命郎官兼領著作郎及佐郎戊申罷都轉運司己酉詔湖南丁米三分之二均取

于民田其一取之丁口辛亥孟庾自軍中來朝九月戊  
午呂頤浩罷詔凡遇水旱災異監司郡守卽具奏毋隱  
庚申岳飛自江州來朝川陝統領官吳勝敗僞齊兵于  
黃堆砦丙寅以趙鼎爲江西安撫制置大使壬申詔中  
書舍人給事中凡制勅非軍期機速必先書押而後報  
行甲戌僞齊王彥先寇徐宿二州乙亥以劉光世爲江  
東淮西宣撫使置司池州韓世忠爲鎮江建康府淮南  
東路宣撫使置司鎮江府王玠爲荆南府岳鄂潭鼎澧  
黃州漢陽軍制置使置司鄂州岳飛爲江南西路舒蘄  
州制置使置司江州主管殿前司郭仲荀知明州兼沿

海制置使神武中軍統制楊沂中兼權殿前司己卯吳勝克蓮花城冬十月癸未朱勝非上重修吏部七司勅令格式庚寅加吳玠檢校少保壬辰趣王玠進兵詔寬私鹽重法甲午卻大理國入貢丁酉殘破州縣視戶口增損立守令考課法己亥禁州縣擅增置稅場偽齊李成陷鄧州辛丑南丹蠻莫公晟圍觀州焚寶積監殺知監陳烈壬寅偽齊兵逼襄陽李橫以糧盡棄城奔荆南知隨州李道亦棄城去甲辰王玠討湖賊戰于鼎口不利偽齊陷鄧州守臣李簡棄城去申禁私役戰士丁未命三省除銓曹姦弊戊辰罷諸路類省試統制石世達

及杜湛合兵大破湖賊黃誠于龍陽洲庚戌復置宗正少卿及寺監諸丞是月王彥先引兵至北壽春將渡淮劉光世駐軍建康扼馬家渡又遣酈瓊駐無爲軍爲廬濠聲援賊乃還十一月己未以右文殿修撰王倫爲都督府參議官癸亥詔監司帥守察內外宗子病民害政者以聞崔增吳全遇湖賊于陽武口死之甲子韓肖胄等使還乙丑禁沿淮諸砦兵擅侵齊境庚午臨安府火甲戌禁掠賣生口入蠻夷嶮峒及以銅錢出中國乙亥復元祐十科舉士法丁丑命賓橫宜觀四州市戰馬戊寅王夔自鼎州引兵還鄂留統領王渥等四軍聽程昌

寓節制已卯蠲南劍州所負民間獻納錢十六萬緡省  
淮南州縣文武官十二月辛巳朔降勅書撫諭吳玠及  
川陝將士乙酉臨安府火戊子又火朱勝非以屢火求  
罷不允丙申王似承制廢通遠軍己酉金國元帥府遣  
李永壽王翊來見是歲海寇黎盛犯潮州焚民居毀城  
去

四年春正月辛亥朔帝在臨安率百官遙拜二帝乙卯  
增淮浙路鹽鈔貼納錢遣章誼等爲金國通問使己未  
程昌寓遣杜湛王渥攻楊太皮真砦破之己巳詔諭王  
似盧法原吳玠使之協和金人犯宕昌臨江砦及花石

峽關師古遣統領劉戩分兵拒却之庚午詔諸路將帥毋以兩國通使輒弛邊備淮南州郡津渡尤慎譏察甲戌罷州縣新置弓手乙亥蠲循梅潮惠四州被兵家租賦丙子申勅三省樞密院除官並遵舊制毋相侵紊除拜罷免皆明示黜陟之由戊寅金人犯神盃砦沿北嶺至大散關臨安府火己卯韓肖胄罷二月壬午詔賊罪至死者仍籍其貲癸未作建康府行宮席益罷乙酉以徐俯兼參知政事丙戌禁川陝諸將招納北軍湖北軍賊檀成犯長陽縣解潛遣統領胡勉捕斬之羣盜田政自襄陽犯陝州己丑解潛遣統制王恪擊政斬之庚寅

金人犯兩當縣乙未詔孟庠赴行在己亥詔三衙管軍  
及將帥觀察使以上舉忠勇智略可自代者一人辛丑  
金人犯仙人關癸卯詔權以射殿爲景靈宮四時設位  
朝獻丙午張浚入見三月辛亥朔吳玠率楊政吳璘田  
晟王喜諸將與兀朮戰于仙人關大敗之兀朮遁去戊  
午雨雹以趙鼎參知政事壬戌孟庠至行在罷都督府  
以其兵屬張俊乙丑張浚以資政殿大學士罷尋落職  
奉祠福州居住己巳蠲淮南州縣民租一年辛未日有  
青赤黃氣編次建炎以來詔旨頒諸路癸酉蠲興元府  
洋州被兵家稅役二年丙子以王似爲資政殿學士川

陝宣撫使盧法原爲端明殿學士與吳玠並充副使關  
師古爲熙河蘭廓路安撫制置使夏四月庚辰朔命趙  
開再任總領四川財賦詔諭川陝官吏兵民以張浚失  
措當示遠竄猶嘉其所用吳玠等能禦大敵許國一心  
止從薄責仍令宣撫司講求諮訪凡擾民拂衆之事速  
釐革之癸未劉子羽白州安置乙酉詔明堂用皇祐典  
禮兼祀天皇帝神州地祇以下諸神丙戌吳玠敗金  
兵復鳳秦隴州詔特旨處死情法不相當者許大理奏  
審蠲淮南州軍上供錢一年庚寅置孳生牧馬監于臨  
安府甲午罷廣西提舉茶鹽司關師古叛以洮岷二州

降僞齊吳玠併將師古軍乙未詔諸路歲上戶口丁酉  
罷諸州回易庫庚子命劉光世遣兵巡邊辛丑保靜州  
夷人入貢丙午徐俯罷是月王似承制廢符陽軍知壽  
春府羅興叛降僞齊五月庚戌朔以岳飛兼黃復二州  
漢陽軍德安府制置使癸丑以范沖爲宗正少卿兼直  
史館重脩神宗哲宗正史實錄甲寅詔淮南帥臣兼營  
田使守令以下兼管營田岳飛復郢州斬僞齊守荆超  
甲子以孟庾兼權樞密院事乙丑賜李橫軍絹萬匹丙  
寅李成棄襄陽去岳飛復取之金人攻金州鎮撫使王  
彥遣統制許青等與戰于漢陰敗之罷諸縣武尉壬申

裁省三省樞密細務責六曹長貳專決癸酉以國史日  
歷所爲史館僞齊收李成餘衆益兵駐新野岳飛與別  
將王萬夾擊復大敗之乙亥王彥數敗金兵于洵陽縣  
丙子復選宗室子彥之子伯玖育于禁中六月壬申復  
命川陝類試乙未太白晝見經天戊戌詔神武軍神武  
副軍統制統領官並隸樞密院庚子以霖雨罷不急之  
役壬寅詔三省樞密院凡奉干請墨勅許執奏不行置  
史館校勘官作明堂行禮殿于教場甲辰禁諸軍彊刺  
平人爲兵己刺者皆釋之吳玠乞宮觀不允是月熒惑  
犯南斗岳飛將牛臯復隨州執僞齊守王嵩磔之秋七

月戊申朔曲赦虔州以吏部尚書胡從年簽書樞密院  
事庚戌以湖南安撫席益爲安撫制置大使建昌軍軍  
卒修達等作亂殺守臣劉滂江西制置使胡世將遣參  
謀侯懋統制丘贊討之壬子命吳玠通信夏國癸丑湖  
賊楊欽等破社木砦官軍敗卻小將許筌戰歿丙辰賞  
仙人關之功以吳玠爲檢校少師奉寧保靜軍節度使  
吳璘楊政以下論賞有差丁巳命左右司歲考郎官功  
過治狀以爲賞罰庚甲復曲端趙哲官壬戌岳飛遺統  
制王貴張憲擊敗李成及金兵于鄧州之西復鄧州禽  
其將高仲丙寅侯懋引兵入建昌軍執修達等十三人

斬之罷建州蠟茶綱詔江東安撫司招水軍千五百人  
己巳湖賊萬餘人詣鼎澧二州降劉光世來朝庚午王  
貴張憲破金齊兵復唐州及信陽軍襄漢悉平辛未章  
誼孫近使還入見粘罕致書約淮南毋得屯兵八月庚  
辰以趙鼎知樞密院事充川陝宣撫處置使湖賊夏誠  
等犯枝江縣解潛遣將蔣定舟與戰敗之辛巳吳玠遣  
統領姚仲攻隴城縣克之壬午王夔以討賊無功降光  
州觀察使戊子改命趙鼎都督川陝荆襄諸軍事乙未  
遣魏良臣等充金國通問使丙申毀王安石舒王誥己  
亥周十隆出降爲官軍所掠復遁去犯汀循州壬寅王

似罷以岳飛爲清遠軍節度使湖北荆襄潭州制置使  
代王夔討湖賊癸卯以襄陽府隨郢唐鄧州信陽軍六  
郡爲襄陽府路九月戊申減淮浙路鹽鈔所增貼納錢  
壬子夏誠遣將李全功犯公安軍解潛遣統制林閏等  
擊斬之安定郡王令時薨辛酉合祭天地于明堂大赦  
蠲襄陽等六郡三年租稅庚午朱勝非罷金齊合兵自  
淮陽分道來犯壬申渡淮楚州守臣樊釵棄城去韓世  
忠自承州退保鎮江府癸酉以趙鼎爲尚書右僕射同  
中書門下平章事兼知樞密院事吏部尚書沈與求參  
知政事冬十月丙子朔與趙鼎定策親征命張浚以軍

援淮東劉光世移軍建康車駕擇日進發丁丑以孟庾爲行宮留守留統制王進一軍及神武中軍五百人隸之百司不豫軍旅之務者聽從便避兵己卯韓世忠自鎮江率兵復如揚州金人犯滁州以張浚爲浙西江東宣撫使金人圍亳州席益遣統制吳錫率兵討徭賊楊再興大破之壬午僞齊兵犯安豐縣癸未復以張浚爲資政殿學士提舉萬壽觀兼侍讀甲申復以王玠爲建武軍承宣使江西沿江制置使丙戌命胡松年詣江上會諸將議進兵戊子韓世忠邀擊金人于大儀鎮敗之又遣將董收敗之于天長縣鴉口橋己丑金人攻承州

韓世忠遣將成閔解元合兵擊于北門敗之金人圍濠  
州甲午遣秘書正字楊晨持詔撫諭四川遣侍御史魏  
玘監察御史田如鼇詣劉光世張浚軍中計事光世始  
移軍太平州丙申命後宮自溫州泛海如泉州金人陷  
濠州守臣寇宏棄城走丁酉詔州縣團教弓手土兵戊  
戌帝御舟發臨安劉錫楊沂中以禁兵扈從己亥韓世  
忠捷奏至命收瘞戰死將士仍令胡松年致祭庚子張  
浚率兵發鎮江如建康壬寅帝次平江加贈陳東歐陽  
澈祕閣修撰官其子孫二人各賜田一頃且追咎汪伯  
彥落觀文殿學士黃潛善更不追復命韓世忠楊沂中

分兵控扼沿海要地癸卯焚決淮東閘堰賜扈從諸軍錢乙巳仇恣遣將孫暉擊金人于壽春敗之復霍丘安豐二縣是月借江浙坊場錢一界以備軍費十一月戊申太白晝見庚戌賞承州水砦首領徐康等要擊金兵之功轉官有差仍蠲承楚泰州水砦民兵賦役十年置沿江烽火放浙東諸郡防城丁夫壬子始下詔聲劉豫逆罪諭親討之旨以厲六師吳玠遣統制楊從儀等率兵敗金人于臘家城癸丑玠乞納節贖劉子羽罪遂聽子羽自便金人入光州甲寅僞齊知光州許約破石額山砦遂據之乙卯韓世忠遣兵夜劫金人營于承州破

之金人犯六合縣丙辰掠全椒縣三城湖丁巳戒諸路大小臣僚借貸催科縱吏姦擾民及務絕盜賊之伺隙者命董收趙康直總領淮東水砦戊午以胡松年兼權參知政事金人陷滁州劉光世移軍建康韓世忠移軍鎮江張浚移軍常州己未復命張浚知樞密院事以其盡忠竭節詔諭中外庚申宴犒守江將士癸亥劉光世遣統制王德擊金人于滁州之桑根敗之揭黃榜招諭湖賊甲子命滁和諸州移治保聚乙丑金人犯滁口己巳劉光世遣統制王師晟等率兵夜入南壽春府襲金人敗之執僞齊知府王靖廣賊區稠圍韶州樂昌縣鈐

轄韓京遣兵擊斬之詔張浚視師江上十二月乙亥朔  
魏良臣王繪還自泗州軍前入見戊寅命都督府右軍  
統制李貴部兵屯扼福山鎮辛巳命中軍統制王進屯  
兵泰州防拓通泰壬午以樞密都承旨馬擴爲江西沿  
江制置副使丙戌吳倫遣兵攻臘家城破之丁亥聽兩  
淮避兵民耕種所在閒田壬辰金齊兵逼廬州仇愈嬰  
城固守岳飛所遣統制徐慶牛臯援兵適至敗走之劉  
光世亦遣統制靳賽戰于慎縣張浚遣統制張宗顏擊  
敗金人于六合詔江浙荆湖十四郡各募水軍五百人  
名橫江軍兩浙十郡沿江海州縣招捕巡檢土軍甲午

程昌寓遣杜湛彭筠合擊楊欽破之己亥以來年正旦  
日食下詔修闕政求直言庚子金人退師辛丑詔葬祭  
浙西江東二軍之死事者壬寅省淮南轉運司遣胡松  
年往常熟縣江陰軍沿江計議軍事癸卯金人去滁州

宋史卷二十七考證

高宗紀四紹興三年秋七月丁卯詔訪求累朝勲臣曹

彬等三百人子孫以備錄用○

臣蒲封

按續文獻通

考徽猷閣待制宋伯友入對言功臣子孫凋喪殆盡  
乞訪其後量才錄用故有是詔其後得趙普趙安仁  
范質錢若水諸孫皆官之

宋史卷二十七考證

宋史卷二十八

元中書右丞相總裁脫脫等修

本紀第二十八

高宗五

五年春正月乙巳朔日有食之帝在平江府金人去濠州丁未戒諸軍戰陳毋殺中原民籍充金兵者命粥官田宅輸錢專充軍費戊申進廬泰二州守禦官屬各一官已酉詔前宰執呂頤浩等十九人及行在職事官各條上攻戰備禦措置綏懷之策免淮南官吏去職之罪仍令還任承州水砦統領仲諒復入楚州庚戌張浚遣

統領楊忠閔王進來擊金人于淮南岸敗之降其將程師回張延壽辛亥淮東統制崔德明襲敗金兵于盱眙召張浚赴行在乙卯浚入見賞沿江監司帥臣供億之勞各進官一等戊午趣修建康行宮己未詔減淮南諸州雜犯死罪釋流以下囚庚申置諸州軍教場選兵專習弓弩立格按試辛酉贈殿中侍御史馬伸左諫議大夫韓世忠劉光世張俊入見壬戌以世忠爲少保淮東宣撫使駐鎮江光世少保淮西宣撫使駐太平俊開府儀同三司江東宣撫使駐建康甲子鄭瓊復光州降其守許約乙丑罷淮南茶鹽提刑司置提點兩路公事官

一員兼領刑獄茶鹽漕運市易事淮西要會州軍並置  
市易務戊辰詔川陝宣撫司招諭陷賊官民庚午命王  
進合江西廣東諸將兵討周十隆海賊朱聰犯廣州又  
犯泉州壬申劉光世韓世忠張俊入辭命升殿以光世  
世忠有隙賜酒諭釋之皆感激奉詔癸酉僞齊知亳州  
馬泰犯光州權州事王萃率兵拒之是月金主晟殂旻  
之孫亶立岳飛自池州入朝二月丙子以飛爲鎮寧崇  
信軍節度使命常州布衣陳得一造新歷丁丑帝發平  
江戊子遣權太常少卿張銖奉迎太廟神主于温州壬  
午帝至臨安進扈從官吏秩一等丙戌以趙鼎爲左僕

射張浚右僕射並同中書門下平章事兼知樞密院事  
都督諸路軍馬岳飛爲荆湖南北襄陽府路制置使將  
兵平湖賊楊太丁亥吳璘楊政攻拔秦州執僞齊守胡  
宣金帥撒離曷來援政復擊敗之己丑詔建太廟壬辰  
命張浚詣江上措置邊防詔諭諸路宣撫制置司示以  
專任之旨以右司諫趙霈論奏得體賜三品服丁酉進  
執政官秩一等以賞防秋之功戊戌詔淮南宣撫司撫  
存淮北來歸官吏軍民己亥直史館范冲上神宗實錄  
考異庚子詔翰林學士孫近胡交修類編臣僚條具利  
害章疏以聞甲辰蠲湖南路上供三年是月僞齊商元

寇信陽軍守臣舒繼明被禽死之閏月乙巳朔雨雹丁未胡松年罷戊申雪已酉留四川上供銀帛就充軍費乙卯以孟庾沈與求並兼權樞密院事丙辰併諸路提舉常平入茶鹽司罷福建鑄錢令轉運坑冶司辦集丁巳撤離曷欲犯秦州吳玠遣部將牛皓伺之遇于瓦五谷戰死癸亥海賊陳感犯雷州官軍屢敗丁卯王瓊罷命戶部尚書章誼措置財用孟庾提領號總制司命川陝宣撫司幕僚攝司事仍權節制軍馬戊辰置路分總管以處閑退武臣辛未復置宗正丞掌修屬籍再蠲荆南府歸峽二州荆門公安二軍歲貢上供二年三月甲

戊朔以王瓊貪縱不武敗師誤國責授濠州團練使丙子遣樞密計議官呂用中等分使兩浙江東西路檢察經總制司財用丁丑詔侍從至監察御史館職已上在內館職在外侍從官監司帥守各舉所知充監司守令尋命館職專舉縣令己卯以韓世忠兼鎮江府宣撫使劉光世兼太平州宣撫使壬午以都督府參議軍事邵溥兼權川陝宣撫副使罷御前軍器所提舉官併隸工部壬辰命廣東福建路招捕朱聰乙未初權鉛錫張浚親討湖賊丁酉復移浙西安撫司于臨安府庚子罷饒州牧馬監夏四月丙午貴池縣丞黃大本坐在法贓杖

春刺配南雄州丁未遣司農丞蓋諒持詔撫諭川陝召  
解潛赴行在王彥知荆南府諸鎮撫使至是盡罷戊申  
太廟神主至自温州己酉以審量濫賞追左銀青光祿  
大夫王序八官及職名仍改正出身庚戌詔內侍遇特  
恩轉官止武功郎壬子訪得周後柴叔夏襲封崇義公  
戊午奉安太廟神主己未更免役保正長法甲子太上  
皇帝崩于五國城丙寅帝卽射殿行朝獻景靈宮之禮  
始以惠恭皇后祔祭募民耕營田官給牛種庚午省四  
川添差官辛未以諸路稅賦畸零增收錢專充上供是  
月龍圖閣直學士致仕楊時卒五月乙亥初謁太廟庚

辰命邵溥吳玠裁省四川冗官浮費辛巳名行宮新作  
書院爲資善堂遣何鮮等奉使金國通問二帝中書舍  
人胡寅言國家與金世讐無通使之義張浚奏使事兵  
家機權後將闢地復土終歸於和未可遽絕乃遣行丁  
亥立殘破州縣守令勸民墾田及拋荒殿最格己丑以  
孟庾知樞密院事壬辰召張浚還行在丁酉詔浚提舉  
詳定一司勅令戊戌以貴州防禦使瑗爲保慶軍節度  
使封建國公徽猷閣待制范冲兼資善堂翊善起居郎  
朱震兼讚讀以盛暑命監司行部慮囚己亥岳飛軍次  
鼎州庚子周十隆降辛丑命川陝訪求元祐黨人子孫

六月甲辰封武經大夫令疋爲安定郡王湖賊楊欽全  
琮劉詵相繼率衆詣岳飛降乙巳名新歷曰統元丁未  
併饒州鑄錢司于虔州己酉命建國公瑗出就資善堂  
聽讀拜范冲朱震出內帑錢賜宗室貧者壬子復省淮  
南州縣冗官癸丑以久旱減膳祈禱禁諸路科率自租  
稅和市軍須外皆罷岳飛急攻湖賊水砦賊將陳瑁降  
楊太赴水死餘黨劉衡等皆降飛急擊夏誠斬之丁巳  
湖賊黃誠斬楊太首挾鍾子儀周倫詣都督府降湖湘  
悉平得戶二萬七千悉遣歸業戊午減福建貢茶歲額  
之半庚申以旱罷諸路檢察財用官丁卯以賊平免沿

湖民前二年逋租己巳罷福建諸州槍仗手秋七月壬申朔以仇愈爲沿海制置使甲戌免蘄州上供及租稅三年戊寅獎諭岳飛撫勞將士趣張浚還朝己卯孟庾罷以沈與求兼權樞密院事及措置財用壬午以金軍虜州隸襄陽府路僞齊兵寇湖陽縣執唐州守臣高青復釋之丁亥賜宇文虛中家福建田十頃甲午詔殘破州縣親民官計到罷之日戶口考殿最韓世忠復鎮淮軍禽僞齊守王拱丙申蠲湖南路上供米三年及秋租之半丁酉置高峯王口二砦都巡檢使益兵戍之八月壬寅朔罷荆南營田司令安撫司措置官兵耕種甲辰

定館職額爲十八員壬子詔淮南山水砦都巡檢各聽  
守令節制癸丑蠲福建州軍借撥常平錢米己未下詔  
示章惇蔡卞詆誣宣仁聖烈皇后之罪追貶惇昭化軍  
節度副使卞單州團練副使子孫不許在朝命廣宮學  
教內外宗子辛酉詔淮南襄陽府等路團結民社丙寅  
以諸盜平減湖廣江西二十二州雜犯死罪釋徒杖以  
下囚海賊朱聰降命補水軍統領是月僞齊陷光州九  
月辛未朔罷總制司所增收頭子等諸色錢乙亥賜禮  
部進士汪洋以下二百二十人及第出身唱名始遵故  
典令館職侍立殿上壬午加岳飛檢校少保僞齊兵寇

固始縣統領華旺拒戰却之尋復光州甲申命沿海州軍籍海舶分守要害乙酉趙鼎上重修神宗實錄壬辰詔元符上書邪等范柔中等二十七人各官一子以解潛部兵三千隸馬軍司甲午周十隆復叛犯汀州戊戌遣統領王進李貴討之冬十月庚戌張浚入見乙卯以席益爲四川制置大使位宣撫副使上州軍兵馬並隸大使司邊防重事仍令宣撫司處置李綱爲浙西制置大使呂頤浩爲湖南制置大使戊午詔川陝類試合格第一人依殿試第三人例推恩餘並同賜進士出身特奏名進士命宣撫選官試時務策澧州賊雷德進降乙

丑僞齊兵寇漣水軍韓世忠遣統制呼延通等逆擊敗之十一月庚午朔初置節度使以下金字牙符命都督府掌之給將帥立戰功者命州縣賣戶帖以助軍費癸酉詔守臣死節昭著者毋限品秩並賜諡乙亥徵和靖處士尹焞于涪州命爲崇政殿說書戊寅郊辛巳復置淮南提舉鹽事官壬午出宮女三千人甲申權減宰執及行在官吏奉乙酉以趙開爲四川都轉運使丙戌命張浚視師荆襄川陝戊子知衡州裴廩坐調夫築城凍死二千餘人除名嶺南高州編管乙未出內帑綿絹賜宗室丁酉罷催稅戶長十二月己亥朔以岳飛爲荆湖

南北襄陽府路斬黃州招討使楊沂中權主管殿前司  
併統神武中軍庚子改神武四軍及巡衛軍號行營五  
護軍辛丑以都督府兵隸三衙命左右司樞密院檢詳  
官參考中興已行條例修爲定法乙巳禁服用翠羽己  
酉免侍從官輪對庚戌汰橫江水軍三之一癸丑命兩  
淮川陝荆襄荆南諸帥府參謀官各一員提點屯田癸  
亥禁川陝州縣官悉用川陝人丙寅都督府遣參議軍  
事劉子羽主管機宜文字熊彥詩撫諭川陝且察邊備  
虛實戊辰夜雨雹

六年春正月辛未蠲貧民戶帖錢之半無物產者悉除

之癸酉命給事中中書舍人甄別元祐黨籍乙亥以內  
重外輕命省臺寺監及監司守令居職及二年者許更  
迭出入除擢丁丑詔凡入粟補官者毋授親民刑法之  
職壬午賜宗子伯玖名璩爲和州防禦使罷綿州宣撫  
副使命吳玠專治兵事罷御史平反刑獄賞丙戌張浚  
視師荆襄入辭己丑安定郡王令玪薨庚寅還預借坊  
場錢辛卯詔監司帥臣慢令失職者令張浚黜陟以聞  
甲午振江湖福建浙東饑民命監司帥臣分選僚屬及  
提舉常平官躬行檢察戊戌命鬻通直郎閣門宣贊舍  
人以下官二月庚子以諸路宣撫制置大使並兼營田

大使宣撫副使招討安撫使並兼營田使壬寅雨雪改  
江淮屯田爲營田甲辰置行在交子務印交子錢引繪  
諸路令公私同見錢行用戊申岳飛入見復以襄陽府  
路爲京西南路辛亥詔張浚暫赴行在奏事甲寅以兵  
部尚書都督府參謀折彥質簽書樞密院事乙卯韓世  
忠引兵攻宿遷縣統制呼延通與金兵戰敗之禽其將  
孛董牙合澧州賊徒伍俊殺雷德進持其首詣鼎州降  
丙辰韓世忠圍淮陽軍復置諸路市易務戊午命楊沂  
中以兵萬人聽都督行府調遣己未遣戶部侍郎劉寧  
止如鎮江府總領三宣撫司錢糧辛酉兀朮救淮揚韓

世忠引兵歸楚州壬戌以折彥質兼權參知政事癸亥  
沈與求罷李綱入見是月張浚至江上會諸將議事命  
張俊進屯盱眙三月戊辰朔初收官告綾紙錢名均房  
州民兵曰保勝又命招刺三千人賜名必勝軍己巳以  
韓世忠爲京東淮東路宣撫處置使岳飛爲京西湖北  
路宣撫副使辛未蠲旱傷州縣民積欠錢帛租稅己卯  
趣岳飛如鄂州措置軍事辛巳以樞密副都承旨馬擴  
爲沿海制置副使壬午金齊兵犯漣水軍韓世忠擊敗  
之壬辰寬四川災傷州縣戶帖錢之半夏四月戊戌朔  
湖南賊黃旺犯桂陽監甲辰僞齊兵陷唐州團練判官

扈舉臣推官張從之等皆死岳飛以母喪去官丙午詔  
飛起復己酉詔文武臣僚能決勝彊敵恢復境土者賜  
功臣號庚戌始訓諸宗子名甲寅賞淮陽功呼延通等  
進官有差餘受賞者凡萬七千人劉光世遣副統制王  
師晟酈瓊襲偽齊兵于劉龍城破之禽其統制華知剛  
己未命福建安撫司發水軍討海賊鄭慶辛酉禁四川  
伐並邊山林甲子以韓世忠爲橫海武寧安化軍節度  
使號揚武翊運功臣除商旅緡錢稅丙寅復行在官吏  
奉蠲東京民渡淮南商販之稅五月戊戌朔禁以鹿胎  
爲冠癸酉詔未經上殿臣僚先令三省審察然後引對

戊寅以四川監司地遠玩法應有違戾令制置大使按劾壬午詔大理寺議獄不合卽詣刑部關決刑部不能定同赴都堂稟議賜吳玠四川戶帖錢十萬緡犒軍癸未禁淮南州縣收額外雜色租乙酉改交子爲關子罷交子務庚寅以劉光世爲保靜寧武寧國軍節度使壬辰以張俊進屯盱眙改崇信奉寧軍節度使甲午禁銷錢及私鑄銅器丙申詔監司慮囚不能徧及者聽遣官著爲令六月乙巳朔夜地震己酉求直言甲寅張浚渡江撫淮上諸屯命劉光世自當塗進屯廬州岳飛自九江進屯襄陽楊沂中屯泗州戊午詔兩淮沿江守臣並

以兩三年爲任辛酉封集英殿修撰令憲爲安定郡王  
秋七月壬申以司農少卿樊賓提領營田公事癸未詔  
張浚暫赴行在癸巳罷川陝便宜差遣監司守貳以金  
州隸川陝路均房二州隸京西南路郭浩爲永興軍路  
經畧安撫使兼知金州閤門宣贊舍人邵隆知商州聽  
浩節制經理商虢是月劉光世復壽春府八月己亥范  
宗尹薨庚子賜左司諫陳公輔三品服癸卯以徽猷閣  
直學士李迨爲四川都轉運使甲辰詔諭將士將親征  
岳飛遣統制牛皐破僞齊鎮汝軍禽其守薛亨乙巳命  
權殿前司解潛等帥精兵扈從主管步軍司邊順留兵

守臨安知臨安府梁汝嘉爲巡幸隨軍都轉運使丁未以秦檜爲醴泉觀使兼侍讀行宮留守孟庾提舉萬壽觀兼侍讀同留守戊申岳飛遣將楊再興復西京長水縣己酉命秦檜孟庾權參決尚書省樞密院事庚戌蠲虔州殘破諸縣逋負梅州夏秋兩稅聽廣東經畧安撫司便宜措置盜賊辛亥奉神主發臨安丁巳權罷經筵進講己未預借江浙民來年夏稅絕帛折米輸官庚申增給職事官米月三斛是月張浚城盱眙進屯泗州岳飛及僞齊李成孔彥舟連戰至蔡州克之僞守劉永壽舉城降九月丙寅朔帝發臨安岳飛遣統制王貴郝晟

董先復號州盧氏縣癸酉帝次平江戊寅命職事官日  
一員輪對壬午岳飛以孤軍無援復還鄂州癸未權奉  
安神主于平江能仁寺戊子以戶部郎官霍蠡總領岳  
飛軍錢糧庚寅張浚入奏復如鎮江辛卯立賊徒相招  
首罪賞格賞鎮淮軍功進統制王德等官是月劉豫聞  
親征告急于金主亶求援亶不許豫自起兵三十萬命  
子麟趣合肥姪猊出渦口引兵分道入寇冬十月丙申  
招西北流寓人補闕額禁軍丁酉裁定淮南路租額劉  
麟寇淮西張浚遣楊沂中張宗顏等分兵禦之戊戌沂  
中至濠州劉光世已棄廬州而南浚遣人督還光世不

得已駐兵應沂中遣統制王德酈瓊及賊將崔臯賈澤  
王遇戰皆敗之賊兵攻壽春府芍陂砦守臣孫暉拒戰  
又敗之辛丑罷四川監酒官百餘員壬寅以梁汝嘉兼  
浙西淮東沿海制置使前護副軍都統制王彥副之癸  
卯趙鼎請降勅諭張浚令光世沂中及張俊全軍引還  
爲防江之計甲辰又詔浚督將士僇力破賊皆未達劉  
猊犯定遠縣沂中進戰大敗之于藕塘猊挺身遁麟在  
順昌聞之拔砦去劉光世遣王德及沂中追麟至南壽  
春而還孔彥舟亦解光州圍而去戊申命解潛遣兵千  
人守青龍港口癸丑張俊楊沂中引兵攻壽春府不克

而還乙卯詔諸軍所俘人民給錢米遣歸丁巳惠州軍賊曾袞作亂庚申摧鋒軍統制韓京募敢死士夜襲破之袞尋出降壬戌日中有黑子殺十二月甲午朔詔降廬光濠等州死罪釋流以下囚召秦檜赴行在張浚入見請幸建康趙鼎請還臨安戊戌韓世忠攻淮陽軍及金人戰敗之辛丑城南壽春府壬寅趙鼎罷遣右司員外郎范直方宣諭川陝撫問吳玠將士甲辰命都督府參議軍事呂祉如建康措置移蹕丙午折彥質罷丁未賞淮西功加張俊少保改鎮洮崇信奉寧軍節度使楊沂中保成軍節度使殿前都虞候戊申命秦檜赴講筵

供職孟庾爲行宮留守辛亥以資政殿學士張守參知政事兼權樞密院事丙辰以呂頤浩爲浙西安撫制置大使判臨安府丁巳以劉光世爲護國鎮安保靜軍節度使戊午詔凡因民事被罪者不許親民己未命辰沅靖澧四州以閒田募刀弩手三千五百人爲額右司諫陳公輔乞禁程氏學詔士大夫之學宜以孔孟爲師庶幾言行相稱可濟時用庚申以安化郡王王稟死節太原賜其家田十頃辛酉以山陰諸暨等四十縣爲大邑並命堂除

七年春正月癸亥朔帝在平江下詔移躡建康蠲無爲

軍稅役一年置建康御前軍器局丁卯賞張浚以破敵  
功遷特進己巳發米萬石濟京東陝西來歸之民張浚  
入見甲戌罷都督府諸州市易官丁丑解潛罷以劉錡  
權主管馬軍司并殿前步軍司公事庚辰築采石宣化  
渡二城癸未以翰林學士陳與義參知政事資政殿學  
士沈與求同知樞密院事詔廣西帥臣訓練土丁保丁  
乙酉復置樞密使副知院以下仍舊張浚改兼樞密使  
丙戌禁諸軍互納亡卒西蕃三十八族首領趙繼忠等  
來歸丁亥以秦檜爲樞密使何鮮范寧之至自金國始  
聞上皇及寧德皇后崩己丑帝成服下詔降徒囚釋杖

以下辛卯夜東北有赤氣如火二月癸巳朔日有食之  
百官七上表請遵以日易月之制徽猷閣待制知嚴州  
胡寅請服喪三年衣墨臨戎以化天下帝欲遂終服而  
張浚連疏論喪服不可卽戎遂詔外朝勉從所請宮中  
仍行三年之喪丙申太平州火丁酉鎮江府火庚子遣  
王倫等使金國迎奉梓宮岳飛入見辛丑以日食求直  
言以久旱命諸州慮囚乙巳詔凡辟舉官犯贓罪罪及  
所舉官丙午吳玠置銀會子于河池丁未詔席益募陝  
西河東河北兵三千部送行在克扈衛癸丑雨雹丙辰  
始御便殿果州守臣宇文彬等進禾登九穗圖俱奪一

官罷之丁巳以岳飛爲太尉湖北京西宣撫使己未帝發平江三月癸亥朔次丹陽韓世忠入見命世忠扈從岳飛次之甲子次鎮江楊沂中入見命沂中總領彈壓巡幸事務己丑蠲駐蹕及經從州縣積年逋賦丁卯以吏部侍郎呂祉爲兵部尚書都督府參謀軍事辛未帝至建康壬申詔尚書省常程事從參知政事分治癸酉減建康流罪以下囚蠲建康府太平宣州逋賦及下戶今年身丁錢岳飛乞併統淮西兵以復京畿陝右許之命飛盡護王德等諸將軍旣而秦檜等以合兵爲疑事遂寢戊寅手詔撫勞將士進沈與求知樞密院事己卯

尊宣和皇后爲皇太后庚辰以王彥兵隸侍衛馬軍司  
呂頤浩爲少保兼行宮留守孟庾罷甲申以劉光世爲  
少師萬壽觀使以其兵隸都督府張俊因分爲六軍命  
呂祉節制乙酉賜光世第于建康府丁亥命虔吉南安  
軍諸縣各募土兵百人責知縣訓練防禦盜賊是春廣  
西大饑李實變爲桃夏四月癸巳築太廟于建康以臨  
安府太廟爲聖祖殿戊戌修濬建康城池丁未岳飛乞  
解官持餘服遂棄軍去詔不許戊申日中有黑子庚戌  
以張浚累陳岳飛積慮專在併兵奏牘求去意在要君  
遂命兵部侍郎兼都督府參議軍事張宗元權湖北京

西宣撫判官實監其軍壬子張浚如太平州淮西視師  
庚申以信陽軍隸京西路罷淮南提點司東西兩路各  
置轉運兼提點刑獄提舉茶鹽常平事五月丁卯詔李  
綱趣捕虔吉諸盜壬申命禮官舉文宣王武成王熒惑  
壽星嶽鎮海瀆農蠶風雷雨師之祀甲戌以胡安國提  
舉萬壽觀兼侍讀趣赴行在未至而罷癸未以鄺瓊爲  
行營左護軍副都統制甲申初試樞密院都督府劾士  
乙酉命侍從官通舉材堪知縣者二十人丙戌僞齊陷  
隨州己丑禁四川增印錢引六月辛卯朔改上惠恭皇  
后諡曰顯恭皇后岳飛入見壬辰命歲辰戌月祀大火

配以闕伯乙未罷江淮營田司令諸路安撫轉運司兼  
領其事丙申以重脩神宗實錄去取未當命史館復加  
考訂丁酉岳飛引過自劾詔放罪慰諭之戊戌命劉錡  
兼都督府咨議軍事率兵戍廬州乙巳沈與求薨召王  
德以所部兵赴行在遣呂祉如淮西撫諭諸軍丙辰詔  
吳玠李迨共議四川經費贍軍恤民岳飛復職秋七月  
戊辰詔侍從各舉可任監司郡守者一二人癸酉以旱  
禱於天地宗廟社稷甲戌嗣濮王仲湜薨癸未以久旱  
命中外臣庶實封言事甲申蠲諸路民積年逋租以建  
康疫盛遣醫行視貧民給錢葬其死者命疎決滯獄乙

西詔卽建康權正社稷之位戊子詔戶部長貳迭出巡按諸路考究財賦利病違者劾之己丑詔諸路歸業民墾田及八年始輸全稅八月乙未以張俊爲淮西宣撫使駐盱眙楊沂中爲淮西制置使主管侍衛馬軍司劉錡副之並駐廬州命酈瓊率兵赴行在戊戌瓊叛殺中軍統制張景等執呂祉及趙康直趙不羣以兵四萬人奔劉豫辛丑手詔赦廬州屯駐行營左護軍壬寅酈瓊引兵至淮殺祉及康直釋不羣使還劉錡吳錫至廬州以兵追之不及命張宗元往招之張浚乞去位甲辰以趙鼎爲萬壽觀使兼侍讀甲寅詔命官犯贓刑部不得

擅黥配聽朝廷裁斷乙卯賜岳飛軍錢十萬緡招歸正  
復業人耕湖北京西閒田九月甲子上太上皇帝諡曰  
聖文仁德顯孝皇帝廟號徽宗皇后曰顯肅皇后丁卯  
韓世忠張俊入見乃命俊自盱眙移屯廬州壬申張浚  
罷癸酉命參知政事輪日當筆權三省事更不分治常  
程罷都督府甲戌以臺諫累疏落張浚觀文殿大學士  
仍領宮祠丙子復以趙鼎爲尚書左僕射同中書門下  
平章事兼樞密使戊寅以廬州壽春府民遭酈瓊虜掠  
蠲租稅一年己卯朝獻聖祖于常朝殿庚辰朝饗太廟  
辛巳合祭天地于明堂大赦召劉光世赴行在戊子禁

諸路進羨餘以劉錡知廬州兼淮西制置副使冬十月  
庚寅朔詔仍舊開經筵辛卯命後省官看詳上書有可  
采者條上行之丁酉夜勅張浚安置嶺表戊戌趙鼎累  
請浚母老改永州居住僞齊犯泗州守臣劉綱擊走之  
丙午命戶部郎官薛弼霍蠡同總領江西湖廣五路財  
賦壬子統制呼延通王權等襲擊金人于淮陽軍敗之  
丁巳詔六參日輪行在百官一員轉對閏月癸亥贈趙  
康直徽猷閣待制乙丑蠲江東路月椿錢萬緡發米二  
萬石振京西湖北饑民丙寅尹焞入見命爲秘書郎兼  
崇政殿說書甲戌始作徽宗皇帝顯肅皇后神主庚辰

韓世忠引兵渡淮逆擊金人于劉冷莊敗之辛巳李綱  
罷癸未復漢陽軍是月張俊棄盱眙引兵還建康十一  
月丙申賜吳玠犒軍錢百五十萬緡丁酉以知溫州李  
光爲江西安撫制置大使丁未金帥撻懶兀朮入汴京  
執僞齊劉豫廢爲蜀王癸丑詔來春復幸浙西是月僞  
齊知臨汝軍崔虎詣岳飛降十二月庚辰復置都大提  
舉四川茶馬監牧官丁卯祔徽宗皇帝顯肅皇后神主  
于太廟庚午以解潛權主管馬步軍司命韓世忠留屯  
楚州屏蔽江淮己卯詔內外大將及侍從官舉武臣智  
畧器局堪帥守謀議官者癸未王倫等使還入見言金

國許還梓宮及皇太后又許還河南諸州甲申城泗州  
丁亥復遣王倫等奉迎梓宮是冬吳玠遣裨將馬希仲  
攻熙州鄭宗李進攻鞏州不克宗死于城下希仲遁還  
玠斬以徇

宋史卷二十九

元中書右丞相總裁脫脫等修

本紀第二十九

高宗六

八年春正月戊子朔帝在建康丙申減臨安府夏稅折  
輸錢戊戌張守罷辛丑僞齊知壽州宋超率兵民來歸  
蔡州提轄白安時殺金將兀魯執其守劉永壽來降詔  
以方議和好禁沿海州郡遣人過淮招納丁未大閱張  
俊軍戊申以兵部侍郎胡世將爲四川安撫制置使二  
月戊午劉錡入見減建康府夏稅折輸錢蠲民戶逋租

和市科調庚申日中有黑子以呂頤浩爲江東安撫制  
置大使兼行宮留守壬戌岳飛乞增兵不許癸亥帝發  
建康丙寅以胡安國春秋傳成書進寶文閣直學士戊  
寅帝至臨安己卯以戶部尙書章誼爲江東安撫制置  
大使兼行宮留守呂頤浩爲醴泉觀使甲申減紹興府  
和市絹萬匹三月己丑以知南外宗正事仲儻嗣濮王  
庚寅以禮部尙書劉大中參知政事兵部尙書王庶爲  
樞密副使壬辰復以秦檜爲尙書右僕射同中書門下  
平章事兼樞密使甲午陳與義罷戊戌增夔州路路分  
都監一員脩治關隘練義兵己亥蠲農器及牛稅以李

天祚爲靜海軍節度使交趾郡王壬寅定以故相韓忠  
彥配享徽宗廟廷丁未蠲所過州縣民積欠稅賦戊申  
蠲江西湖南諸州月椿錢各萬緡己酉命考覈川陝宣  
撫司便宜所授官冒濫尤甚者悉與裁減夏四月庚申  
初置戶部和糴場于臨安壬戌遣王庶巡視江淮邊防  
丁丑復置六路發運司癸未詔三衙管軍輪宿禁中五  
月庚戌詔鎮江府募橫江軍千人竄內侍羅亶于海島  
庚子禁貧民不舉子其不能育者給錢養之壬寅貶劉  
子羽爲單州團練副使漳州安置丁未金國使烏陵思  
謀石慶克與王倫等偕來戊申以資政殿學士葉夢得

爲江東安撫制置大使己酉王庶至淮南檄張宗顏將  
兵七千屯廬州巨師古三千屯太五州分韓世忠軍屯  
泗州及天長縣六月壬戌賜衍聖公孔玠衢州田五頃  
奉先聖祠事癸亥趙鼎上重修哲宗實錄壬申賜禮部  
進士黃公度以下三百九十五人及第出身王庶自淮  
南還入見乙亥以中護軍統制張宗顏知廬州命劉錡  
率兵移屯鎮江府丁丑烏陵思謀石慶克入見秋七月  
乙酉朔復命王倫及藍公佐奉迎梓宮錄司馬光曾孫  
伋補承務郎辛亥彗出東方八月戊午詔日者遣使報  
聘鄰國期還梓宮尙慮邊臣未諭遂弛戎備以疑衆心

其各嚴飭屬城明告部曲臨事必戒無忘捍禦甲子蠲  
江東路月椿錢萬三千緡有奇丁丑彗滅遣監察御史  
李案宣諭江西措置盜賊冬十月丁巳劉大中罷甲戌  
趙鼎罷乙亥日中有黑子丁丑金國使張通古蕭哲與  
王倫偕來韓世忠乞奏事行在不許戊寅樞密副使王  
庶乞免簽書和議文字累疏求去不許十一月甲申以  
翰林學士承旨孫近參知政事丙戌遣大理寺丞薛倬  
朱斐詣廣南路決滯獄戊戌王倫入見己亥復以倫爲  
國信計議使中書舍人蘇符副之符辭以疾庚子以孫  
近兼權同知樞密院事辛丑詔金國遣使入境欲朕屈

己就和命侍從臺諫詳思條奏從官張燾晏敦復魏矼  
曾開李彌遜尹焞梁汝嘉樓炤蘇符薛徽言御史方廷  
實皆言不可甲辰王庶罷辛亥以樞密院編修官胡銓  
上書直諫斥和議除名昭州編管壬子改差監廣州都  
鹽倉十二月甲寅以趙鼎爲醴泉觀使乙卯以宗正少  
卿馮楫爲國信計議副使己未以吏部尙書李光參知  
政事戊辰王倫言金使稱詔諭江南其名不正秦檜以  
未見國書疑爲封冊帝曰朕嗣守祖宗基業豈受金人  
封冊癸酉館職胡瑄朱松張擴凌景夏常明范如圭上  
書極論不可和甲戌以端明殿學士韓肖胄簽書樞密

院事乙亥命肖胄等爲金國奉表報謝使丙子張通古  
蕭哲至行在言先歸河南地徐議餘事以監察御史施  
廷臣爲侍御史權吏部尙書張燾侍郎晏敦復以廷臣  
主和議而升用執奏不行御史中丞勾龍如淵右諫議  
大夫李誼殿中侍御史鄭剛中凡再至都堂及宰執議  
取國書丁丑詔金國使來盡割河南陝西故地通好于  
我許還梓宮及母兄親族餘無需索令尙書省榜諭庚  
辰帝不御殿以方居諒陰難行吉禮命秦檜攝冢宰受  
書以進是月虛恨蠻犯嘉州忠鎮砦是歲始定都于杭  
九年春正月壬午朔帝在臨安丙戌以金國通和大赦

河南新復州軍官吏並不易置蠲其民租稅三年徭役  
五年以王倫同簽書樞密院事充奉護梓宮迎請皇太  
后交割地界使戊子遣判大宗正事士儂兵部侍郎張  
燾詣河南修奉陵寢庚寅賜劉光世號和衆輔國功臣  
張俊加少傅安民靖難功臣韓世忠爲少師張浚復左  
宣奉大夫辛卯以尹焞爲徽猷閣待制提舉萬壽觀兼  
侍讀焞力辭不拜壬辰加岳飛吳玠並開府儀同三司  
楊沂中太尉癸巳建皇太后宮甲午金宿州守臣趙榮  
來歸丙申金主詔諭河南諸州以割地歸我之意改發  
運經制司爲經制司命戶部長貳一人領使仍置副或

判官戊戌以王倫爲東京留守郭仲荀爲副戶部侍郎  
梁汝嘉兼江淮荆浙閩廣路經制使司農卿霍蠡爲判  
官己亥以吳玠爲四川宣撫使二月癸丑以徽猷閣待  
制周聿爲陝西宣諭使監察御史方廷實宣諭三京淮  
北丁巳以郭仲荀爲太尉東京同留守慕洵寇環州戊  
午以知金州郭浩爲陝西宣撫判官壬戌以李剛爲湖  
南路安撫大使張浚知福州尋復資政殿大學士爲福  
建路安撫大使命周聿方廷實蒐訪隱士甲子均定諸  
州縣月椿錢己巳以郭浩爲陝西宣諭使壬申命修徽  
宗實錄癸酉詔盜賊已經招安而復嘯聚者發兵加誅

毋赦是月日中有黑子月餘乃沒江西統制官李貴以  
其軍歸楊沂中三月丁亥以和州防禦使璩爲保大軍  
節度使封崇國公丙申王倫受地于金得東西南三京  
壽春宿亳曹單州及陝西京西之地兀术還祁州己亥  
分河南爲三路廢拱州辛丑以翰林學士樓炤簽書樞  
密院事甲辰僞齊知開封府鄭億年上表待罪召赴行  
在丁未正僞齊所改州縣名是春夏人陷府州夏四月  
庚戌朔呂頤浩薨辛亥命樓炤宣諭陝西諸路壬午金  
鄜延路經畧使闕師古上表待罪命知延安府癸丑落  
趙鼎奉國軍節度使爲特進仍知泉州金陝西諸路節

制使張中孚上表待罪命爲檢校少保寧國軍節度使  
知永興軍節制陝西諸路軍馬甲子以觀文殿學士孟  
庾爲西京留守資政殿學士路允迪南京留守丙寅金  
秦鳳經略使張中彥上表待罪命知渭州以孫近兼權  
同知樞密院事壬申移壽春府治淮北舊城癸酉詔新  
復諸路監司帥臣按劾官吏之殘民者韓世忠張俊入  
見五月庚寅奉迎東京欽先孝思殿累朝御容赴臨安  
辛卯復命江淮守臣二年爲任乙未復置淮東提舉茶  
鹽司癸卯復召募耆長法丙午鄜延副將李世輔部兵  
三千自鳳翔來歸賜名顯忠六月庚戌皇后邢氏崩于

五國城辛亥夏國主乾順卒壬子樓炤以東京見卒四千四百人爲忠銳三將庚申盜入邵武軍壬戌以新復州縣官吏懷不自安降詔開諭己巳吳玠薨壬申樓炤承制以李顯忠爲護國軍承宣使樞密行府前軍都統制率部兵及夏國招撫使王樞赴行在癸酉澧州軍事推官韓紉坐上書論講和非計送循州編管乙亥以孟庾兼東京留守王倫自東京赴金國議事樓炤承制以楊政爲熙河經略使吳璘爲秦鳳經略使仍並聽四川宣撫司節制郭浩爲鄜延經略使同節制陝西軍馬丙子分宣撫司兵四萬人出屯熙秦六千人隸郭浩留吳

玠精兵二萬人屯興元府興洋二州戊寅置錢引務于  
永興軍是月撫州鈐轄伍俊謀據桃源復叛湖北安撫  
薛弼召誅之秋七月甲申以文臣爲新復諸縣令丙戌  
東京耆老李茂松寇璋等二百人奉表稱賀皆引見補  
官遣還復置都水南北丞各一員丁亥金人拘王倫于  
中山丙申命詳驗劉豫僞官換給告身乙巳給還僞齊  
所沒民間資產以胡世將兼權主管四川宣撫司八月  
己酉復淮南諸州學官庚戌賜陝西諸軍冬衣絹十五  
萬匹命前川陝宣撫司便宜所補官限一年自陳換給  
告身丙辰金國以撻懶主和割地疑其二心殺之壬戌

蠲成都潼川路歲輸對糴等米五十四萬石水運錢七十九萬緡乙丑給新法度牒紫衣師號錢二百萬緡付陝西市軍儲己巳命陝西復行鐵錢庚午遣蘇符等使金賀正旦乙亥遣前知宿州趙榮知壽州王威俱還金國以關師古爲行營中護軍前軍統制九月己卯命鄜延秦鳳熙河路招納蕃部熟戶及陷沒夏國軍民丙戌封叔士儂爲齊安郡王庚寅罷經制司令提刑兼領常平事甲午名皇太后殿曰慈寧丙申以威州防禦使溫濟告韓世忠陰事勒停南建州編管世忠又奏欲殺之詔移萬安軍己亥郭仲荀率東京兵五千至鎮江冬十

月辛亥詔侍從官各舉所知二人王倫見金主于御林子被拘于河間遣其副藍公佐先歸甲寅王樞入見併其俘百九十人皆縱遣還夏國己未蠲階成岷鳳四州民稅之半戊辰慈寧宮成甲戌日中有黑子丙子賜李顯忠軍錢十萬緡是月岳飛入見十一月戊寅朔賜吳玠家錢三萬緡以其弟璘爲龍神衛四廂都指揮使申命刑部大理官編次刑名斷例癸未嗣濮王仲偃薨己丑詔三省官屬詳覆在京通用令追復張所爲直龍圖閣十二月甲寅命續編紹興因革禮甲子李光罷戊辰命續修元豐會要兀朮留蘇符等于東京謀復取河南

十年春正月丙戌遣莫將等充迎護梓宮奉迎兩宮使  
辛卯李綱薨甲辰以顯謨閣直學士提舉醴泉觀鄭億  
年復資政殿學士奉朝請二月戊申命陝西復募蕃漢  
弓箭手詔賊吏罪抵死情犯甚者奏取旨辛亥雨雹以  
劉錡爲東京副留守李顯忠南京副留守壬子命兩宗  
正官各舉所知宗室二人癸丑展省試期一年壬戌詔  
新復州軍蒐舉隱逸諸路經理屯田丁卯罷史館以日  
歷歸祕書省置監修國史官以孟庾知開封府爲東京  
留守仇愈知河南府西京留守癸酉罷吏部審量宣和  
濫賞三月甲申封闕伯爲商丘宣明王戊子增印錢引

五百萬緡付宣撫司市軍儲川陝宣撫副使胡世將屢言金人必渝盟宜爲備己丑罷諸路增置稅場韓世忠張俊入見始罷內教復營建康行宮丙申蘇符自東京還丁酉命川陝宣撫司軍事不及待報者聽隨宜措置己亥以郭浩知永興軍兼節制陝西諸路軍馬楊政徙知興元府是月命胡世將與夏人議入貢夏人不報夏四月丙午訪求亡逸歷書及精於星歷者辛酉以張中孚爲醴泉觀使中彥提舉祐聖觀趙彬爲兵部侍郎癸亥命部使者歲舉廉吏一人庚午復四川諸州學官壬申韓肖胄罷五月己卯金人叛盟兀朮等分四道來攻

甲申名徽宗御制閣曰敷文乙酉兀朮入東京留守孟  
庾以城降知興仁府李師雄知淮寧府李正民及河南  
諸州繼降丙戌金人陷拱州守臣王慥死之撒離曷自  
河中趨永興軍陝西州縣官皆降丁亥金人陷南京留  
守路允迪降劉錡引兵至順昌府己丑金人陷西京留  
守李利用副總管孫暉皆棄城走鈴轄李興率兵拒戰  
不克辛卯胡世將自河池遣涇原經略使田晟以兵三  
千人迎敵金人京湖宣撫司忠義統領李寶敗金人于  
興仁府境上癸己知亳州王彥先叛降于金金人陷永  
興軍趨鳳翔丁酉命胡世將移陝西之石護軍還屯蜀

口以福建廣東盜起命兩路監司出境共討己亥命劉光世爲三京招撫處置使以援劉錡庚子以吳璘同節制陝西諸路軍馬聽胡世將便宜黜陟處置軍事辛丑金人犯鳳翔府之石壁砦吳璘遣統制姚仲等拒卻之金人圍耀州郭浩遣兵救之金兵解去壬寅金人圍順昌府三路都統葛王裒以大軍繼至劉錡力戰敗之六月甲辰朔以韓世忠太保張俊少師岳飛少保並兼河南北諸路招討使乙巳劉錡遣將閻克戰敗金人于順昌之李村丙午命兩浙江東福建諸州團結弓弩手以仇兪爲沿海制置使詔將佐士卒能立奇功者賞以使

相節鉞官告臨軍給受丁未罷建康府行宮營繕戊申以劉錡爲沿海制置使己酉吳璘遣統制李師顏等戰敗金人于扶風拔之壬子兀朮及宋叛將孔彥舟鄴瓌趙榮等帥衆十餘萬攻順昌府劉錡率將士殊死戰大敗之初秦檜奏命錡擇利班師錡不奉詔戰益力遂能以寡勝衆乙卯順昌圍解兀朮還以知平江府梁汝嘉兼浙西沿海制置使丙辰岳飛將牛臯及金人戰于京西敗之己未劉光世進軍和州郭浩遣統制鄭建克攻破金人于醴州復其城壬戌詔諸司錢物量留經費外悉發以贍軍樓炤以父喪去位甲子撒離曷攻青谿嶺

鄜延經略使王彥率兵戰敗之撒离曷還屯鳳翔命土  
儼主奉濮王祠事張俊遣左護軍都統制王德援劉錡  
德暫至順昌值圍已解復還廬州遣司農少卿李若虛  
詣岳飛軍諭指班師飛不聽丙寅下詔撫諭順昌府官  
吏兵民庚午以劉錡爲武泰軍節度使侍衛馬軍都虞  
候韓世忠遣統制王勝背嵬將成閔率兵至淮陽軍南  
與金人遇擊敗之是月金人圍慶陽府權守臣宋萬年  
固守金人不能下岳飛領兵援劉錡與金人戰于蔡州  
敵之復蔡州閏月癸酉朔張俊遣統制宋超敗金人于  
永城縣朱家村甲戌追孟庾路允迪官徙家屬遠郡丙

子詔三衙管軍及觀察使已上各舉智略勇猛材堪將帥者二人金人犯涇州守臣曲汲棄城去經略使田晟率兵來救金人敗走甲申晟及金人再戰于涇州敗之金人引歸鳳翔乙酉降陝西雜犯死罪釋流以下囚丙戌以胡世將爲端明殿學士吳璘爲鎮西節度使楊政武當節度使郭浩奉國節度使王德攻金人于宿州夜被之降其守馬秦丁亥詔釋順昌府流以下囚再復租稅二年守禦官吏進官一等己丑永興軍鈐轄傅忠信等與金人戰于華陰縣敗之壬辰岳飛遣統制張憲擊金將韓常于穎昌府敗之復穎昌丙申張憲復淮寧府

丁酉趙鼎分司興化軍居住岳飛遣統制郝晟等與金人戰于鄭州北復鄭州李興復汝州與金人戰于河清縣敗之復伊陽等八縣李成遁去韓世忠遣統制王勝王權攻海州克之執其守王山戊戌張俊率統制宋紹等及王德兵會于城父縣鄴瓊及葛王裒遁去遂復亳州己亥金人救海州王權等逆戰敗之復懷二縣庚子張俊棄亳州引軍還壽春再貶趙鼎漳州居住又貶清遠軍節度副使潮州安置秋七月癸卯岳飛遣將張應韓清入西京會李興復永安軍丙午以御史中丞王次翁參知政事己酉岳飛及兀朮戰于郾城縣敗之庚戌

曲赦海州永興軍統領辛鎮及金人戰于長安城下敗之癸丑以楊沂中爲淮北宣撫副使劉錡爲判官甲寅岳飛遣統制楊再興王蘭等擊金人于小商橋皆戰死乙卯金人攻潁昌岳飛遣將王貴姚政合兵力戰敗之王戌飛以累奉詔班師遂自鄆城還軍皆潰金人追之不及潁昌蔡鄭諸州皆復爲金有甲子以釋奠文宣王爲大祀乙丑增收州縣頭子錢爲激賞費金人圍淮寧府趙秉淵棄城南歸辛未金人犯盩厔縣王俊逆戰于東洛谷郤之八月壬申朔以張九成喻樛陳剛中凌景夏樊光遠毛叔度元盥等七人嘗不主和議皆降黜之

乙亥韓世忠圍淮陽軍不克庚辰金人及酈瓊合兵駐于千秋湖陵韓世忠遣統制劉寶等夜襲破之壬午李成犯西京李興擊郤之楊沂中軍于宿州丙戌以郭浩知夔州丁亥楊沂中自宿州夜襲柳子鎮軍潰遂自壽春府渡淮歸金人屠宿州甲午川陝宣撫司統領王喜等遇金人于汧陽縣敗之九月壬寅朔遣起居舍人李易諭韓世忠罷兵時秦檜專主和議諸大帥皆還鎮丁未楊政遣統制楊從儀夜襲金人于鳳翔府敗之戊申金人復入西京李興棄城去庚戌合祀天地于明堂大赦辛酉臨安火戊辰以郭浩知金州節制陝西河東軍

馬兼措置河東忠義軍是秋知代州王忠植舉兵復石代等十一州冬十月癸酉復張浚觀文殿大學士甲戌以王忠植爲建寧軍承宣使河東路經略安撫使戊寅秦檜上重修紹興在京通用敕令格式庚辰金人犯慶陽府守臣宋萬年以城降辛卯金人犯陝州吳琦率兵迎擊敗之庚子金人襲洮州攻鐵城堡統制孔文清惠逢擊敗之是月劉錡入見胡世將命王忠植救慶陽叛將趙惟清執之降于金忠植不屈而死十一月丁未金將合喜復犯陝州吳琦擊卻之又犯寶雞縣統制楊從儀敗之壬子以合喜爲保寧軍節度使是月宜章洞民

駱科叛犯桂陽郴道連賀諸州命發大兵討之十二月  
壬午上皇太后冊寶于慈寧殿丁亥贈王忠植奉國軍  
節度使謚義節辛卯起諸路耆長役錢隸總制司專給  
軍用是月楊沂中引兵還行在

十一年春正月癸卯鳳翔統制楊從儀敗金人于渭南  
庚戌張浚入見乙卯金人犯壽春府守臣孫暉統制雷  
仲合兵拒之丁巳壽春陷暉仲棄城去己未劉錡自太  
平州率兵二萬援淮西庚申金人渡淮辛酉雨雹乙丑  
劉錡至廬州還丙寅兀朮陷廬州戊辰金人陷商州守  
臣邵隆棄城去己巳命楊沂中引兵赴淮西岳飛進兵

江州二月癸酉張俊遣王德渡江屯和州金人退屯昭

關邵隆破金人于洪門復南商乙亥金人復來爭和州

張俊敗之命韓世忠以兵援淮西丙子趣岳飛會兵蘄

黃王德等敗金人于含山縣東己卯統制關師古李橫

擊敗金人于巢縣復之庚辰岳飛發鄂州辛已知秦州

王喚兼通泰二州制置使癸未王德田師中等擊破金

人復含山縣奪昭關劉錡自東關擊敗金人于青谿甲

申金人復犯昭關王德等又敗之李顯忠遣統領崔臯

擊敗金人于舒城縣丁亥楊沂中劉錡等大敗兀朮軍

于柘臯己丑兀朮親率兵逆戰于店步沂中等又敗之

乘勝逐北遂復廬州是月虔吉州盜賊悉平三月庚子朔張俊進鷺田及賣度牒錢六十三萬緡助軍用壬寅韓世忠引兵趨壽春癸卯復張俊特進金人圍濠州岳飛發舒州甲辰張俊楊沂中劉錡議班師乙巳沂中錡先行俊以輕兵留後丙午詔釋淮西雜犯死罪以下囚丁未金人陷濠州執守臣王進夷其城鈐轄邵青死之戊申張俊遣楊沂中王德入濠州遇金伏兵敗還己酉韓世忠至濠州不利而退辛亥岳飛次定遠縣聞金兵退還屯舒州楊沂中歸行在壬子金人渡淮北歸癸丑張浚歸建康府丁巳劉錡歸太平州甲子行營統制張

彥及金人遇于汧陽之劉坊砦第八將張宏戰沒夏四月丙子復收免行錢己卯孫近罷辛巳以王次翁兼權同知樞密院事韓世忠張浚岳飛相繼入覲壬辰以世忠俊並爲樞密使飛樞密副使命三省樞密院官復分班奏事乙未張浚請以所部兵隸御前罷三宣撫司改統制官爲御前統制官各屯駐舊所丙申以廣西經略使胡舜陟節制廣東湖南兵趣討駱科慕洎破新泉砦又攻會州將官朱勇破之五月辛丑置兩淮江東西湖廣京西三道總領軍馬錢糧官仍掌報發御前軍馬文字癸卯賻恤戰沒將士丁未遣張俊岳飛于楚州巡視

邊防召劉光世赴行在甲寅命樞密行府置司鎮江令  
徧行巡歷措置庚申加楊沂中檢校少保開府儀同三  
司六月乙亥造剋敵弓加秦檜特進進尚書左僕射同  
中書門下平章事兼樞密使癸未張俊岳飛至楚州俊  
以海州城不可守毀之遷其民統韓世忠軍還鎮江惟  
背嵬一軍赴行在甲申知河南府李興部兵至鄂州以  
興爲左軍統制乙丑明州僧王法恩等謀反伏誅壬辰  
劉光世罷爲萬壽觀使秋七月戊戌秦檜上徽宗實錄  
進修撰以下各一官庚子以翰林學士范同叅知政事  
以旱減膳祈禱遣官決滯獄出繫囚丁未加秦檜少保

甲寅罷劉錡兵命知荆南府乙卯詔優獎永興鳳翔秦隴等州縣官到任半年減磨勘任滿遷一官己未加張俊太傅癸亥大雨是月命張俊復如鎮江措置軍務留岳飛行在八月戊辰立祚德廟于臨安祀韓厥甲戌罷岳飛乙亥命諸王後各推年長一人權主祀事癸巳胡世將起復九月癸卯命軍器少監鮑瑀如鄂州根括宣撫司錢穀鄂州前軍副統制王俊告副都統制張憲謀據襄陽爲變張俊收憲屬吏以聞丁未坐監司不按賊吏罪辛亥吳璘拔秦州州將武誼降壬子璘率姚仲及金人戰于丁劉圜敗之楊政克隴州破岐下諸屯郭浩

復華州入陝州甲寅建康大火丙申遣劉光遠等充金  
國通問使吳璘及金人戰于剡家灣大敗之遂圍臘家  
城癸亥璘自臘家城受詔班師楊政郭浩皆引軍還乙  
丑邵隆復虢州郝晟討禽駱科斬之冬十月丙寅朔金  
人陷泗州遂陷楚州丁卯命樞密都承旨鄭剛中宣諭  
川陝戊辰楊政及金人戰于寶雞縣敗之禽通檢字堇  
乙亥兀朮遣劉光遠等還戊寅詔修玉牒下岳飛張憲  
大理獄命御史中丞何鑄大理卿周三畏鞫之壬午遣  
魏良臣王公亮爲金國稟議使乙酉虛恨蠻主歷階詣  
嘉州降癸巳韓世忠罷爲醴泉觀使封福國公是月金

人陷濠州邵隆復陝州十一月己亥范同罷責降李光  
爲建寧軍節度副使滕州安置辛丑兀朮遣審議使蕭  
毅邢其瞻與魏良臣等偕來丁未范同分司筠州居住  
罷判大宗正事士儻同知宗正事士摠申嚴戚里宗室  
謁禁己酉雷壬子蕭毅等入見始定議和盟誓乙卯以  
何鑄簽書樞密院事克金國報謝進誓表使庚申命宰  
執及議誓撰文官告祭天地宗廟社稷辛酉以張浚爲  
檢校少傅崇信軍節度使萬壽觀使是月與金國和議  
成立盟書約以淮水中流畫疆割唐鄧二州畀之歲奉  
銀二十五萬兩絹二十五萬匹休兵息民各守境土詔

川陝宣撫司母出兵生事招納叛亡駱科餘黨歐幻四等復叛桂陽藍山犯平陽縣遣江西兵馬都監程師回討平之十二月丁卯責降徽猷閣待制劉洪道爲濠州團練副使柳州安置癸酉命尙書省置籍勾考諸路滯獄甲戌罷川陝宣撫司便宜行事乙亥兀朮遣何鑄等如會寧見金主且趣割陝西餘地遂命周聿莫將鄭剛中分畫京西唐鄧陝西地界壬午命州縣三歲一置產業部籍民貲財田宅以定賦役禁受賕虧隱舊額丁亥立譏察海舶條法癸巳賜岳飛死于大理寺斬其子雲及張憲于市家屬徙廣南官屬于鵬等論罪有差

人陷濠州邵隆復陝州十一月己亥范同罷責降李光  
爲建寧軍節度副使滕州安置辛丑兀朮遣審議使蕭  
毅邢其瞻與魏良臣等偕來丁未范同分司筠州居住  
罷判大宗正事士儻同知宗正事士摠申嚴戚里宗室  
謁禁己酉雷壬子蕭毅等入見始定議和盟誓乙卯以  
何鑄簽書樞密院事克金國報謝進誓表使庚申命宰  
執及議誓撰文官告祭天地宗廟社稷辛酉以張浚爲  
檢校少傅崇信軍節度使萬壽觀使是月與金國和議  
成立盟書約以淮水中流畫疆割唐鄧二州畀之歲奉  
銀二十五萬兩絹二十五萬匹休兵息民各守境土詔

川陝宣撫司母出兵生事招納叛亡駱科餘黨歐幻四等復叛桂陽藍山犯平陽縣遣江西兵馬都監程師回討平之十二月丁卯責降徽猷閣待制劉洪道爲濠州團練副使柳州安置癸酉命尙書省置籍勾考諸路滯獄甲戌罷川陝宣撫司便宜行事乙亥兀朮遣何鑄等如會寧見金主且趣割陝西餘地遂命周聿莫將鄭剛中分畫京西唐鄧陝西地界壬午命州縣三歲一置產業部籍民貲財田宅以定賦役禁受賕虧隱舊額丁亥立譏察海舶條法癸巳賜岳飛死于大理寺斬其子雲及張憲于市家屬徙廣南官屬于鵬等論罪有差